

EKALESIA FAAPOTOPOTOGA KERISIANO I AMERIKA SAMOA

## OFISA O A'OA'OGA KERISIANO



## VASEGA FEOLOLO



FEPUARI - IUNI

# 2025

VASEGA FEOLOLO - FA'ASOLOGA O MATAUPU  
FEPUARI 02, 2025 – IUNI 29, 2025

| <u>ASO/MASINA</u>           | <u>MATAUPU</u>                                                        | <u>TUSI FAITAU</u> |
|-----------------------------|-----------------------------------------------------------------------|--------------------|
| 1. Fepuari 02, 2025         | O Iesu i le Malumalu                                                  | Luka 2:39-2        |
| 2. Fepuari 09, 2025         | Papatisoga o Iesu e Ioane                                             | Luka 3:15-22       |
| 3. Fepuari 16, 2025         | Ua tofotofoina Iesu e le tiapolo                                      | Luka 4: 1-12       |
| 4. <b>Fepuari 23, 2025</b>  | <b>MATAUPU FA'AMANATU</b>                                             |                    |
| 5. Mati 02, 2025            | O le uiga faigofie o le upu manumalo                                  | 1 Ioane: 1-5       |
| 6. Mati 09, 2025            | Faaeaina i le manumalo                                                | 11 Timoteo 2: 8-13 |
| 7. Mati 16, 2025            | O le tatalo e maua ai le manumalo i faafitauli o le olaga             | Mataio 6: 5-13     |
| 8. Mati 23, 2025            | O le vivii a Hana i le Atua                                           | 1 Samuelu 2: 1-10  |
| 9. <b>Mati 30, 2025</b>     | <b>MATAUPU FAAMANATU (O le Manumalo)</b>                              |                    |
| 10. Aperila 06, 2025        | O upu taumavae a Iesu i ona so'o                                      | Ioane 16: 1-33     |
| 11. Aperila 13, 2025        | E ao i tagata uma ona vivii ma faafetaia le Atua i lana faaolataga    | Mataio 21: 1-11    |
| <b>(ASO SA LAUPAMA)</b>     |                                                                       |                    |
| 12. Aperila 20, 2025        | O le toetu manumalo a'ia'i o Iesu mai le tuugamau ma le oti           | Ioane 20: 1-18     |
| <b>(ASO SA ESETA)</b>       |                                                                       |                    |
| 13. <b>Aperila 27, 2025</b> | <b>MATAUPU FA'AMANATU (Agai atu Iesu i lona manumalo silisiliese)</b> |                    |
| 14. Me 04, 2025             | O Iesu o le vine moni                                                 | Ioane 15: 1-17     |
| 15. Me 11, 2025             | O le foai i mea silisili ua ia te ia                                  | Mareko 14: 1-9     |
| <b>(ASO SA O TINĀ)</b>      |                                                                       |                    |
| 16. Me 18, 2025             | Faataoto i le tovine                                                  | Luka               |
| 20: 1-18                    |                                                                       |                    |
| 17. <b>Me 25, 2025</b>      | <b>MATAUPU FA'AMANATU (Faataoto a Iesu)</b>                           |                    |
| 18. Iuni 01, 2025           | Liliuina le suavai e fai ma uaina                                     |                    |
| Ioane 2: 1-11               |                                                                       |                    |

19. Iuni 08, 2025  
Ioane 6: 1-14

Faailoga o le fafagaina o tagata i le vao

### **ASO SA PENETEKOSO**

20. Iuni 15, 2025  
Kenese 45: 1-11

E manuia fanau ona o le Tama

*(ASO SA O TAMĀ)*

21. Iuni 22, 2025

**SU'EGA AFA MUAMUA O LE TAUSAGA – 2025**

### **IA MANUIA GALUEGA O LENEI TAUSAGA**

**ASO SA: FEPUARI 02, 2025**

**MATAUPU: O Iesu i le malumalu.**

**TUSI FAITAU: Luka 2:39-52**

**TAULOTO: Luka 2: 52** “Ua tupu Iesu i le tino ma le atamai, na fiafia foi ia te ia le Atua atoa ma tagata.”

**Sini:** *Ia malamalama tamaitii i le faamoemoe male pogai na alu ai Iesu i le malumalu*

#### **FESOASOANI MO LE FAIAOGA:**

Fa'atalofa atu i a outou susuga i Faiaoga i le amataga o lenei tausaga fou fa'alea'oa'oga. Taofi ua maua se faasiliga-malosi o le tino, mafaufau ma le agaga i malologa sa feagai ai ma aso fiafia ua mavae atu nei. Afai e to'alua oulua ma se tasi uso-a-faia'oga, e lelei ona amata e le isi faia'oga le fa'afeiloa'iga o fanau a'o gasolo atu. O i'ina fo'i e maka ai loa le tauvala'auga ma tusi lana sene. E lāvea uma ai mea na i le taimi e tasi, ma fa'asao ai le taimi mo le lesona. Ae saga'i ane le isi faia'oga i ni nai pesepesega e fa'aala ai pe fa'aoso ai fo'i le lagona fiafia i le a'oga i lenei Aso muamua o le Aoga. E lelei le filifili o ni pese e feso'ota'i ma le lesona, ina ia saga fa'amautu ai le tala ma le a'oa'oga o le a fa'alogo i ai.

E maualuga le fa'amoemoe ua lava sauni a outou susuga i Faiaoga, e lē tau va'ai ai i le Tusi ma fa'amatala le lesona. E toto'a ai lau silasila ma lau va'ai i lau vasega, ma avanoa ai outou aao(lima) mo nisi tāga po'o ni fa'ata'ita'iga e fia fai. O nai fa'amanatu lava, ae talitonu ua nofofale i o outou finagalo tapenaga mo le galuega. Ua na o se alafua a le Ofisa e tatala ai la outou tapenaga, ae ua taoto atu ia outou susuga le tele o metotia e faatinoina ai le a'oa'oina o lesona mo nai fanau. Manuia le galuega i lenei Aso Sa mo nai fanau.

#### **FESOASOANI MO LE MATAUPU:**

O le tala lea sa tatou faitauina i lenei taeao, o le molimau lea a le tusitala o Luka, ina ua toe foi matua o Iesu ma nisi o lo latou aiga i Nasareta, ae nofo ai Iesu i Ierusalem. Manatua foi outou le fanau, na mafua ona malaga Iesu ma ona matua i Ierusalem, ona o le tausamiga o le Paseka e pei ona masani ai. Peitai, o lea ua toe foi matua o Iesu ma le aumalaga i Nasareta, ae ua le alu ai Iesu.

I le 12 o tausaga o Iesu, na alu ai se malaga umi a lo latou aiga i Ierusalem e pei ona masani ai. Na matuā faatumulia le aai i tagata na malaga atu e faamanatu le Paseka. Peitai, ina ua ma'ea, ona toe fo'i lea o Iosefa ma Maria ma le manatu o loo latou o faatasi ma Iesu. Ae ina ua latou taunuu i Nasareta, ua la'ua iloa ai e lei o atu i latou ma Iesu, le ala lea na la sa'ilia ai o ia i o la tauaiga, ae la te le'i maua ai Iesu.

Sa la toe fo'i i Ierusalem, ma sa'ili le la tama mo aso e tolu. Na i'u ina la o atu i le malumalu. O i inā sa maua atu ai Iesu o loo nonofo faatasi ma a'oa'o, ma faalogologo lelei ma fai atu fesili tāua iā i latou. O le ofo tele o nei a'oa'o na latou tuufesili ai iā Iesu, ma na taufaiofo i latou i ana tali. Sa latou iloa e malamalama Iesu i le Tulafono a le Atua.

O le popole tele o Iosefa ma Maria. Lea na mafua ai ona fesili atu ai Maria ia Iesu “La’u tama e, ua ma fiu ma lou tamā e su’e oe. O fea sa e iai ua popole o ma’ua loto ia te oe? Na tali mai Iesu: “Pe lua te lē iloa ea e tatau ona ou iai i le fale o lo’u Tamā?”

Ioe fanau, o le iai o Iesu i le malumalu o le ata o le tapenaga o lana misiona ua amata, a lea e saili atu e ona matua ma le loto popole, ae sau le tali a Iesu. E tatau ona ou iai i le fale o lo’u Tama. Fai mai sa toe fo’i Iesu faatasi ma ona mātua i Nasareta. Na a’oa’oina e Iosefa Iesu i le auala e fai ai galuega faakamuta. O le ā sou manatu, o le ā se ituaiga o tagata sa iai Iesu a o talavou? Ioe, a o tuputupu a’e Iesu, na faateleina fo’i lona poto ma lona atamai ma ua alofaina o ia e le Atua atoa ma tagata.

O lea ua amata ona tapena Iesu mo lana misiona na Afio mai ai i le lalolagi nei. Ioe, fai mai le fuaiupu ua fai ma a tatou tauloto o lenei taeao, **“Ua tupu Iesu i le tino ma le atamai, na fiasia foi ia te ia le Atua atoa ma tagata.”** Ioe, ia faapenaina foi i tatou le fanau, ua tutupu i tatou i le tino, ua a’oa’oina foi i tatou i le poto ma le atamai mai le Atua, le gata i Aso Sa taitasi e pei foi o lenei taeao fou, a o le aoaoina foi o outou i le poto ma le atamai lautele i a’oa’oga o lo’o outou ao’oga ai. Ioe, ia avea i tatou e pei o Iesu, e lelei ona saili mai o tatou matua, a o lea e maua mai i totonu o le malumalu o le Atua. Ia manuia tele outou le fanau.



#### FESILI:

- Aiseā na o ai Iesu ma ona matua i Ierusalema?  
*Na o i le tausamiga o le Paseka*
- O fea tonu sa maua atu ai Iesu, e ona matua?  
*Sa maua atu i totonu o le malumalu*
- O le a se a’oa’oga ua e maua mai le tala i lenei taeao?  
*(tuu le avanoa e faasoa mai ai nai fanau)*

**PESE:** Faitau le tusi paia ma tatalo i aso uma.

#### Ia manuia lenei Aso Sa

\*\*\*\*\*

**ASO SA: FEPUARI 09, 2025**

**MATAUPU: Papatisoga o Iesu e Ioane.**

**TUSI FAITAU: Luka 3: 15-22**

**TAULOTO: Luka 3: 22** Ona afio ifo lea o le Agaga Pa’ia i ona luga, ua tino mai e peiseaī se lupe, ua o’o mai fo’i le si’ufofoga mai le lagi, ua fa’apea mai, “O lo’u Atali’i pele oe, ua ou fiasia lava iā te oe.”

**Sini:** *Ia malamalama tamaiti ma iloa e tamaiti le papatisoga o Iesu e Ioane mo le amataina o lana galuega.*

**FESOASOANI MO LE FAIAOGA:**

Mālo le soifua manuia i lenei vaega o a outou suesuega, faafetai i le Atua ua maua se malosi e faaauau ai o tatou tiute ma faiva e pei ona valaauina ai i tatou e le matai o le galuega. Ae alo ane ia mo a outou tapenaga aua nai fanau ma lo latou naunau atu i le fia faalogologo pea i le Talalelei ia Iesu Keriso ma lona alofa laveai. E iai le talitonuga ua na o se amataga, ae taoto atu ia outou susuga i Faiaoga aua ua outou silafia lelei le ituaiga kiliva e momoli ai le feau ma le Lesona mo nai fanau o lo’o outou mafuta i si a outou galuega. A e manatu e lelei fo’i ona toe fa’auau a lua matāfaioi amata pei o le Aso Sa ua tuanai atu: fa’afeiloa’i, ma maka le tauvala’auga, tusi ane sene e le isi uso a faia’oga, ae sauni loa le isi uso a Faia’oga, mo le tatalo amata, toe faamanatu le lesona ua tuanai, soso’o ai lava ma le Lesona o lenei Aso Sa. Ia faamanuia atu le Atua i a outou susuga ma tapenaga o feagai ai.

### **FESOASOANI MO LE MATAUPU:**

I le tala'aga o le faamamaina poo le papatisoga o tagata Isaraelu na amata i le faamamaina o tagata ua agasala i le va ma le Atua, i le faatonuga lea na tuu ai e le Alii ia Mose ina ia faatonu ai le fanauga uma a Isaraelu

Peitai, i le papatisoga o Iesu e Ioane, o le papatisoga ina ia faataunuu folafolaga uma na finagalo iai le Atua ina ia faataunuuina. O le ala lea na o atu ai tagata ia Ioane, pe le o ia lea o le Keriso. Ae fai mai Ioane, leai o a’u ou te papatiso ia te outou i le vai, a e o lo’o mulimuli mai le na te papatisoina outou i le Agaga Pa’ia ma le afi.

Fai mai le molimau a Luka ina ua uma ona papatisoina le nuu ma a’oa’o atu ai Ioane e uiga i le Talalelei ia Iesu, ua ia faailoa foi, o ia o lē alaga i le vao, ma teuteu le ala mo le Alii o le a Afio mai.

Ina ua ma’ea ona papatisoina le nuu, ona ia papatisoina loa lea o Iesu, fai mai le molimau a Luka, a o tatalo o ia, ua avanoa le lagi, ma Afio ifo le Agaga Paia peiseaī se lupe ma lona tino mai. Ioe, lea ua outou faalogo ma tatou iloa ai, le matautia o le papatisoga o Iesu e pei ona faataunuuina e Ioane, ma le taua o le fuaiupu lea ua fai ma a tatou tauloto i lenei taeao. (faitau faatasi) ***“Ona afio ifo lea o le Agaga Pa’ia i ona luga, ua tino mai e peiseaī se lupe, ua o’o mai fo’i le si’ufofoga mai le lagi, ua fa’apea mai, “O lo’u Atali’i pele oe, ua ou fiasia lava iā te oe.”***

Fanau o le amataga lena o le galuega talai ma le Faaolataga na Afio mai ai Keriso mo le lalolagi atoa, ina ia tatou maua le ola ma ia tatou iloa, e le alu atu lava se tasi i lona Tama, pe a le ui mai ia te ia, o Iesu lea. Ioe, fanau ua valaauina foi outou e le Atua ina ia outou o e fai mea uma ma le faamaoni, toaga e fai au meaaoga, faalogo ma usitai, i outou matua, o Tama ma Tina, o le Faiaoga ma isi tagata matutua e tatau ona e faaaloalo ma ava iai, ae aua nei galo ia sili atu lou faalogo ma usitai i le Atua, e pei ona faia e Ioane le papatiso, na ia manatu e le tatau ona ia papatisoina Iesu, peitai fai mai Iesu ia Ioane, e tatau ona faataunuuina mea uma na faatonuina ai oe e le Atua.

Ia tatou iloa la ma mautinoa, e tatau ona tatou faalogo ma usitai, ona tatou taunuu ai lea i se taunuuga manuia ma lelei. Ia manuia tele outou le fanau.

### **FESILI:**

- E iai se upu e te manatua mai le fuaiupu lea na tatou faitauina i le amataga?  
*Ae a le fa’amamāina*
- E fa’apefea ona teu le afioga a le Atua i lou loto lea e fai mai ai le fuaiupu e 22?  
*Tauloto*
- O le a se a’oa’oga taua ua e maua mai le tala sa tatou faalogo iai i lenei taeao?  
*(tuu le avanoa i fanau).*

**PESE:** Faalogo ma usitai e leai se ala e fiasia ai Iesu.

\*\*\*\*\*

**ASO SA: FEPUARI 16, 2025**

**MATAUPU: Ua tofotofoina Iesu e le tiapolo.**

**TUSI FAITAU: Luka 4: 1-12**

**TAULOTO: Luka 2: 52** “Ua tupu Iesu i le tino ma le atamai, na fiafia foi ia te ia le Atua atoa ma tagata.”

**Sini:** Ia iloa e tamaiti e lei faigata ia Iesu ona faatoilalo le tofotofoina o ia e le tiapolo(satani).

### **FESOASOANI MO LE FAIAOGA:**

Faatatofa atu ia outou susuga i le amataina foi o a outou sutesuega ma a outou tapenaga mo le folafolaina ma le faaauauina o la tatou pito-laaui mo le a’oa’oina o nai fanau a le nuu ma le ekalesia. E ia le manatu o le a lava se taimi e tatou te saili faatasi ai mo lenei Lesona taua e pei ona tatou faaauauina mai le tusi faitau o lenei masina. Ae iai le manatu e fa’auau pea tofiga ma lou uso-a-faia’oga mo le amataina o le vasega. Ua manatu e toe faaoga mai le tauloto a fanau i le Aso Sa ua tuanai atu, ina ia mafai pea e i latou ona tauloto mai tauloto ua tuanai atu, ma ia tauloto aim au mai le tusi pa’ia. Ia ua na o se amataga, e tau tatai ai la outou tapenaga, ae taoto atu lava ia outou susuga, e faatino ane lava i la outou alafua, e masani ai ina ia faigofie ai i nai fanau la latou faalogo mo a tatou Lesona. Ia manuia tele a outou tapenaga.

### **FESOASOANI MO LE MATAUPU:**

Ina ua uma papatisoina Iesu, ona ta’ita’ia lea o ia e le Agaga Paia i le toafa. E le’i ‘ai o ia mo aso e 40, o le ala lea na ia lagona ai le fia taumafa. Ona sau ai lea o le tiapolo e faaosooso Iesu ma fai mai iā te ia: ‘Pe afai o oe moni o le Alo o le Atua, inā fetalai atu ia i nei maa ia liu areto.’ Ae na tali atu Iesu e pei ona ta’ua. ‘Ua tusia e lē na o mea’ai e ola ai le tagata. E mana’omia ona e usiusita’i i upu uma e fetalai mai ai le Atua.’

Ona toe tofotofoina lea e le tiapolo o Iesu e ala i le faapea mai: ‘Pe afai o oe moni o le Alo o le Atua, inā oso ia i lalo mai i lenei vaega maua luga o le malumalu. Ua tusia o le a auina mai e le Atua ana agelu e lavea’i iā te oe.’ Ae na toe tali atu fo’i e Iesu, e pei ona ta’ua. ‘Ua tusia aua e te tofotofu atu i le Alii le Atua.’



Ona faaali lea e satani iā Iesu o malo uma o le lalolagi, o a latou ‘oa ma o latou mamalu ma faapea mai: ‘Ou te avatua iā te oe nei malo uma ma o latou mamalu, pe afai e tau lava ina e ifo mai iā te a’u.’ Ae na tali atu Iesu: ‘Alu ese ia oe satani! Ua tusia e na o le Atua lava e tatau ona e ifo ma tapua’i atu i ai.’

Ona alu ese ai lea o le tiapolo, ma ua ō mai agelu ma avatu iā Iesu mea’ai e taumafa ai. Talu mai lava i lenā taimi, na tala’i atu ai e Iesu le Talalelei i le Malo o le Atua. O le galuega lea sa auina mai ai o ia i le lalolagi e fai, ina ia faailoa atu le mamalu silisiese o le Atua ma ana galuega mamana. Na fiafia tagata i mea sa a’oa’o atu e Iesu iā i latou, ma na latou mulimuli iā te ia i so’o se mea lava sa talai ma malaga agai i ai. Ioe fanau, o le amataga lea o le galuega talai na feagai ma Iesu, ina ua ma’ea ona papatisoina o ia e Ioane i le vai o Ioritana.

O lona uiga, ia tatou iloa ma mautinoa, o Iesu o ia lava o le Alo o le Atua, e tatau ona tatou manino ma malamalama, e leai lava se isi Atua, ua na o le Atua lava e toatasi, tatou te ifo ma tapuai iai. Ia manuia outou le fanau.

**FESILI:**

- E fa'afefea ona tatou 'alo 'ese mai faaosoosoga a le tiapolo/satani?  
*Ia tatou savavali faatasi ma le AgagaPaia o le Aua*
- O a ni a'oa'oga taua ua e maua mai i le tala sa tatou faalogo iai?  
*(Tu'u le avanoa e faasoa mai ai nai fanau).*

**PESE: Ua ou filifili e mulimuli ia Iesu.**

**Manuia lenei Aso Sa**

**ASO SA: FEPUARI 23, 2025**

**MATAUPU: MATAUPU FA'AMANATU - LESONA 1,2,3:**

**FESILI:**

1. Aiseā na o ai Iesu ma ona matua i Ieruselema?  
*Na o i le tausamiga o le Paseka*
2. O fea tonu sa maua atu ai Iesu, e ona matua?  
*O totonu o le malumalu*
3. O le a se a'oa'oga sa e maua mai le tala ia Iesu i totonu o le malumalu?  
*Maka ane ni aoaoga e faasoa ane ai nai fanau*
4. O ai sa papatisoina Iesu?  
*O Ioane le papatiso*
5. Aisea na papatisoina ai Iesu?  
*Ina ia faataunuuina meatonu uma e tusa ma le finagalo o le Atua.*
6. O le a se aoaoga sa e maua mai i le tala i le papatisoina o Iesu?  
*Maka ane ni aoaoga e faasoa ane ai nai fanau.*
7. E fa'afefea ona tatou 'alo 'ese mai faaosoosoga a le tiapolo/satani?  
*Ia tatou savavali faatasi ma le Agaga Paia*
8. O a ni a'oa'oga taua ua e maua mai i le tala sa tatou faalogo iai?  
*Maka ane ni aoaoga e faasoa ane ai nai fanau*
9. Tusi mai le fuaiupu e 22 o le Luka mataupu e 3?  
*“Ona afio ifo lea o le Agaga Pa'ia i ona luga, ua tino mai e peisea'i se lupe, ua o 'o mai fo'i le si'ufofoga mai le lagi, ua fa'a'apea mai, “O lo'u Atali 'i pele oe, ua ou fiafia lava iā te oe.”*
10. O ai Iesu ia te oe?  
*(Talia le faasoa a nai fanau poo ai Iesu ia i latou)*  
*O Iesu o le Alo o le Atua, o ia o lo'u Faaola, o la'u uo.*

**ASO SA: MATI 02, 2025**

**MATAUPU: “O le uiga faigofie o le upu manumalo”**

**TUSI FAITAU: 1 Ioane 5: 1-5**

**TAULOTO: 1 Ioane 5:5** “O ai se na te manumalo i le lalolagi, pe afai e le talitonu, o Iesu o le Alo lava o le Atua.”

**Sini:** Ia malamalama lelei tamaiti i le uiga o le upu manumalo i lenei masina

## **FESOASOANI MO LE FAIAOGA:**

Faatatou atu ia outou susuga i Faiaoga, le Matuaofaiva o nai Fanau aua le Atua ma lona finagalo. Malo lava le onosai ma le faatoatoa i feau ma galiuega aemaise tofiga a le Atua i lo outou soifua ma so matou ola. O lea ua tatou la'a mai i le masina lona lua talu ona amatalia tualumaga faagasolo o Lesona mo nai Fanau. Ia tautuana ma outou le faamamafa o lenei Masina ma lona Autu: "O le Manumalo" ina ia iloa ma malamalama tamaiti i le uiga o le Manumalo mai soo se faamoemoe, ina ua amatamea le Atua i soo se faamoemoega e tapena ai i latou mo le lumanai. Ia, ua na o se amataga e tatala ai lau sailiiliga mo le Tusi Faitau ua tuuina atu mo le tatou tapenaga mo le Lesona, ae manatu ua lava tapena oulua mo le faamoemoe o lenei vaiseuga o tapenaga mo nai Fanau. Ia manuia tapenaga uma mo le Aso Sa.

## **FESOASOANI MO LE MATAUPU:**

E tolu tusi o loo ta'ua o tusi a Ioane. O le Ioane Muamua, Ioane e Lua, ma le Ioane e Tolu.

E ese mai tusi ia e tolu a Ioane, o lo'o i ai foi le tusi ua faaigoaina o le "Evagelia a Ioane." Peitai, o le tele o molimau a le au susesue, o le Evagelia a Ioane ma tusi e tolu a Ioane, sa tusia uma e le aposetolo, poo le soo aupito talavou o Iesu Keriso e igoa ia Ioane, le uso o Iakopo.

O le faamoemoe o le tusi a Ioane muamua lea, o le tusi o loo apoapoa'i ai le aposetolo i tagata Kerisiano o loo faaseseina o latou olaga faale-faatuatua e le tele o aoaoga sese o lea vaitau, ma ua taitai seseina ai o latou olaga mai le upu moni ma ala moni faale-Atua e pei ona aoa mai e Iesu Keriso. O le taitonuga o Ioane, a malamalama lelei tagata Kerisiano i lo latou lava faatuatuaga i le Atua moni, ma lona faaali mai e ala ia Iesu Keriso, ona maua foi lea o lo latou olioli ma le fiafia loloto, ma iloa ai le matagofie o lo latou manumalo i le mafutaga ma lo latou Atua e faavavau.

Fai mai Ioane, ia tumau le faatuatua ma talitonu ia Iesu Keriso, o a faigata ma fita, o faaosoosoga ma faiga taufaasese a le lalolagi, e le mafai lava ona faiaina ai i latou, e manumalo ma maua le fiafia, ina ua tumau i ala o Iesu Keriso, e pei ona a'oa'oina ai i latou.

Ioe, o le Atua lava na ia saili mai ma faaavanoa mai le avanoa mo tatou o tagata agasala tatou te mafuta atu ai. O le Atua mamalu, le Atua silisili ese, le Atua foafoa, le Atua matautia, o le Atua lena lea ua na tatala mai le avanoa i lona alofa tunoa tatou te mafuta atu ai ia te ia.

E le ona o se malosia o se tagata, e le ona o se amiotonu o le tagata, e le ona o le poto ma se atamai o le tagata, e mafai ai ona tupu se mafutaga ma le Atua. E leai. Ae peita'i, ona ua agalelei mai le Atua i le tagata na ia faia i lona faatusa, o lea ua ia saili mai ai ia te oe ma a'u le tagata agasala ina ia faaolaina i taua, ma ia tatou maua ai lona manumalo mai faaosoosoga a le lalolagi.

Ioe fanau, e le mafai ona tatou iloa le matagofie o le manumalo, pe afai tatou te le olaina ala o le Atua, na faailoa mai e Iesu mo i tatou... e matagofie le manumalo ina ua tatou talia Iesu e fai ma Alii ma Faaola mo i tatou e le aunoa.

## **FESILI:**

- O le a se auala tatou te maua ai le manumalo?  
*Ia ola i ala o Iesu ma ia tumau i le faatuatua*
- O le a le uiga o le tusi muamua a Ioane?  
*Apoapoi i le au-kerisiano ina ia tumau i ala o le Alii.*
- O le a se aoaoga taua ua tatou maua mai lenei tusi?  
*(Tuu le avanoa e faasoa mai ai nai fanau)*

**PESE:** "Ua na'o oe o lo'u mana'o" - *"You Are All I Need."*

**ASO SA: MATI 09, 2025**

**MATAUPU: “Faacaina i le manumalo”**

**TUSI FAITAU: 11 Timoteo 2: 8-13**

**TAULOTO: 1 Ioane 5:5** “O ai se na te manumalo i le lalolagi, pe afai e le talitonu, o Iesu o le Alo lava o le Atua.”

**Sini:** Ia malamalama tamaiti i o latou lagona e tupu ae i o latou loto, ina ua faacaina ma faapaleina i le manumalo

### **FESOASOANI MO LE FAIAOGA:**

Ua tatou savalia pea le faitauga o Aso Sa ma a tatou tapenaga e pei ona outou feagai ai. E le ititi foi le agaga faafetai i le Atua ona o le malosi faafouina e foai atu pea mo a outou susuga i Faiaoga i aso taitasi, aemaise ai o le malosi lilo faaleagaga, e gafatia ai ona tatou taumafai e famatala atili le Tusi Paia, e pei ona valaauina ai lo outou soifua ma lo matou ola mo lana feau ma lana galuega folafola. E le suia lava le vaaiga masani, mo a tatou faatinoga amata ma le faagasologa mo le a’oa’oina o Lesona mo nai Fanau. O lo’o faamamafa lava le Manumalo, e ui e eseese tala, ae ‘auga e tasi le faamoemoe ia iloa ai e fanau le tāua o le Manumalo, e mai le Atua soifua e toatasi. O le tauloto a nai fanau, o lo’o tauloto mai pea le tauloto o le Aso Sa ua tuanai atu, ina ia mafai ai ona latou tauloto pea ni mau mai le Tusi Pa’ia, ina ia ‘aia nei toe galo. E o fa’atasi le ‘aia nei’i galo, ma le vivi’i i le Atua. E vivi’i ma fa’afetaia le Atua na avatua manuia, le gata i le Lesona, ae o le a se aogā mo nai fanau i lenei vaiseuga a o feagai ai ma aoga ma le tele o suiga ua o’o mai. Ia, ae e le vāea lava le falaooto i lo oulua finagalo ma la oulua sailiga Faafaiaoga mo le Lesona tapena mo nai fanau, ae ua na o se amataga e tau fesoasoani atu ai i a oulua susesuga. Ia manuia le feagai ai ma Lesona a fanau.

### **FESOASOANI MO LE MATAUPU:**

O le faafetai a Paulo i le Atua ona o le faatuatua, onosai ma le talitigā o Timoteo i mafatiaga o le galuega fa’atala’i. O lona naunauta’iga ia faamumū pea le meaaloa a le Atua, ‘aia nei’i galo ia vivii i le Atua na avatua le lototele ma mea lelei atoa ma fa’amanuia uma ua iai. Ioe, na matuā fetalai tu’u sa’o le Aposetolo, ia **‘aia nei’i galo na toe faatuina mai Keriso na i e ua oti’**, o lona manumalo lena aemaise o manuia o le ekalesia ma ona tagata faatuatua, pe a tumau ma talitonu, i le maliu o Keriso ma lona toe tu manumalo mai i le oti ma le tuugamau. E le’i faigofie le feagai o le Aposetolo ma ona mafatiaga, ona o lona naunau ia tumau ma talitonu le fanau filifilia a le Atua i le Faalataga o lo’o ia Keriso Iesu, aia e leai se isi ala e maua ai e i latou le Manumalo ma manuia i le lagi ma le ola e faavavau.

Ioe le fanau e, o le ata manino lena o le tapenaga a le Aposetolo ma lona naunauta’iga i lona atalii faaleagaga o Timoteo, ia tumau le faatuatua ia Keriso Iesu le Alii toetu, ia onosai i faigata ma faafitauli o le galuega tala’i o le Talalelei ia Iesu Keriso.

Ioe, fai mai le tatou tauloto, **“O ai se na te manumalo i le lalolagi, pe afai e le talitonu, o Iesu o le Alo lava o le Atua.”** e le mafai ona tatou maua le manumalo mai le tele o manaoga mai i o tatou loto, pe afai tatou te faagalo le alofa laveai o le Atua, na Afio mai ai Keriso, o lona maliu ma lona toe soifua manumalo mai le oti ma le tuugamau, ua tatou manumalo faatasi ai mai ia i lona malo e faavavau. Ia tatou tumau la’ia ma le talitonu faatuatua ia Iesu Keriso, a e alu i le Aoga, po’o a lava au feau e fai ia e faalogo ma usitai i ou matua, faaogo ma usitai i lou Faiaoga, ae ia sili ona e faalogo ma usitai i le musumusuga a le Agaga Paia o le Atua, o lo’o fautua atu i mea lelei e ao ona tatou faia e tatou te manuia ma manumalo mai ai i faaosoosoga a le tiapolo ma le fili. Toaga e tatalo ma faitau le Tusi Pa’ia, tatou te tutupu ai pea i le manumalo o le Atua e faavavau...Manuia tele outou le fanau.

### **FESILI:**

- O le a le mea e tatau ona fai e le tagata faatuatua?  
Tuu le avanoa e faoa mai nai fanau (*Vivi’i i le Atua ma ‘aia nei’i galo o Ia*)
- Aiseā na fautua ai le Aposetolo ia Timoteo?  
Tuu le avanoa e faaosoosoga mai ai nai fanau (*ia onosai ma tumau i le galuega talai o le Talalelei ia Iesu Keriso*)

- O a le a’oa’oga sa outou maua mai i lenei taeao?  
Tuu le avanoa mo le faasoa a nai fanau.

**PESE #83 f. 1&2**

*1. Vivi’i atu ia i lo tatou Ali’i*

*2. Ne’i galo i tagata, ē ua ola ai*

**ASO SA: MATI 16, 2025**

**MATAUPU: “O le tatalo e maua ai le manumalo i faafitauli o le olaga”**

**TUSI FAITAU: Mataio 6: 5-13**

**TAULOTO: 1 Ioane 5:5** “O ai se na te manumalo i le lalolagi, pe afai e le talitonu, o Iesu o le Alo lava o le Atua.”

**Sini:** *Ia faamalamalama tamaiti i le taua ma le aoga o le tatalo, ma le uiga o tatalo e talanoa ai i le Atua.*

**FESOASOANI MO LE FAIAOGA:**

Faatalofa atu ia outou susuga i Faiaoga i lenei foi vaega o a tatou tapenaga mo Lesona a nai fanau. E iai lava le talitonuga, ua lava tapena a outou susuga mo Lesona a nai fanau, ae ua na o se amataga e tau tatala ai lau sailiiliga mo le Lesona faaauau ma le manulauti o lenei masina ia faataua pea le malamalama o fanau i le uiga loloto ma le tele o le oa o le uiga o le upu **O le Manumalo**. E taua le malamalama o tatalo e fai i nofoaga faitele e lē sesē pau a ona e lē o faia “i le mea lilo” e pei o a’oa’oga, sa faatonuina ai e Iesu tagata faafiaamitonu, aua ua latou tutu ma tatalo i fetaulaigaala ina ia iloa mai ai i latou e tagata. O le tatalo ma isi faiga faalelotu e mafai ona faatinoina i nofoaga faitele pe afai e faia ma le faamaoni, tuuto, ma le naunau ia viia le Atua. Peitai, o a’oa’oga i tatalo e faasino i tagata i le taimi o Iesu sa latou faaalialia i foliga i fafo a latou tatalo i nofoaga faitele ina ia amanaia i latou e tagata, ma maua ai e i latou le tau i o a latou galuega. Ia o le a taoto atu lava mo lau faasoa e tapena ai mo Lesona o lenei Aso Sa. Ia manuia tele le tapenaga mo le Lesona a nai fanau.

**FESOASOANI MO LE MATAUPU:**

O le tatalo e maua ai le manumalo i faafitauli o le olaga. O le uiga lea o le tatou Lesona e pei ona tau faamatalaina mai e le tusi faitau o lenei taeao, O le tatalo e maua ai le manumalo mai faafitauli o le olaga... I le tusi sa tatou faitauina, o le lauga faamanuia a Iesu i luga o le mauga, sa ia a’oa’o atu ai i le motu o tagata, ina ia latou iloa ma mautinoa o le tatalo e faafofoga mai ai lona Tama i le lagi, pe afai e feagai le tagata ma faafitauli o le olaga, ae a latou tatalo atu i lona Tama o i le lagi ma le loto atoa ma le agaga atoa, ma tuuina atu i le Tama mea uma e mafatia ai. atoa ma o latou manaoga, ona tali mai ai lea o ia e le aunoa.

Ioe, ua a’oa’oina i tatou i le tatalo a le Alii, e tatau foi la ona tatou fiafia e tatalo ma ia tuuina atu ma le loto atoa i le Atua mea uma tatou te mananao iai. O le tatalo e sau mai le loto ma le agaga e mafuta atu ai i le Atua ma le faamaoni, o le tatalo lena lea sa a’oa’oina ai e Iesu le motu o tagata ina ia latou faia, pe a oo ina tatalo atu i le Atua i mea uma e mananao iai. Ia ma le vaega sili ona taua, ia ‘aia nei tautu ia latou upu, a ia tuuina atu ma le loto talitonu ma le faatuatua i le Atua faafitauli ma so’o se mea e mafatia ai, ona tali mai ai lea o le Atua ma manumalo ai i le tele o faaososoga ma faafitauli o lenei olaga.

Ioe fanau, e iai faafitauli e fetaiai ma outou le fanau i lo ouou soifua tuputupua’e, aemaise lenei vaitau ua tele le mau faaososoa e agai mai, le gata i le siosiomaga i totonu o lau Aoga i au uo ma tagata eseese o lo’o iai, a o lou foi Aiga, i lou faalogogata i ou matua ma isi tagata o lo’o outou mafuta, ia e faapena foi i le Aoga Aso Sa, e le o iloa e matou, o lea foi e te nofo mai, a ai o iai se faafitauli o e nofo mai ma oe, e sa’o pe leai... Ioe, o a mea faigata, e pei foi o au-meaaoga, ma nisi lava mea e le o faafaigata ia te oe... Fai mai Iesu la tatou uo faapelepele, ia outou tulivae ma tatalo atu ma le loto atoa i le Atua ona tali mai ai lea o ia e le aunoa.. Ia tatou tatalo ma le faamaoni i le Atua, tatalo ma le faatuatua ma ia tuu atu ia te ia mea uma tatou te vaivai ai, ona tatou manumalo ai lea mai faafitauli o lenei olaga. Ia manuia tele outou le fanau i le alofa o le Atua.

**FESILI:**

- Aisea e taua ai le tatalo ma le loto atoa i le Atua?  
E tali mai le Atua e le aunoa, aua e silasila le Atua i le loto ma le agaga o le tagata.

- O le a se A'oa'oga ua e maua mai i le tatou Lesona o lenei taeao?  
Tuu le avanoa sei faasoa mai ai nai fanau.

## **PESE: Ua ou filifili e mulimuli ia Iesu**

\*\*\*\*\*

**ASO SA: MATI 23, 2025**

**MATAUPU: “O le vivii a Hana i le Atua”**

**TUSI FAITAU: 1 Samuelu 2: 1-10**

**TAULOTO: 1 Ioane 5:5** “O ai se na te manumalo i le lalolagi, pe afai e le talitonu, o Iesu o le Alo lava o le Atua.”

**Sini:** *Ia malamalama tamaiti i le mafuaga o le vivii o Hana i le Atua, o le faailoga o le olioli ina ua manumalo ma faaeaina e le Atua.*

## **FESOASOANI MO LE FAIAOGA:**

E le ititi le agaga faafetai i le Atua ona o lana tausiga alofa i lo outou soifua ma so matou ola, le ala lea e le mafai ai lava ona alu loa la tatou folasaga, e aunoa ma so matou faatalofa atu, ia outou susuga i Faiaoga, o le Matuaofaiva o le mataupu silisili, aua le faafaileleina o Alo ma Fanau a lo tatou nuu ma le ekalesia. Malo le soifua manuia, malo le lava-papale i tiute ma faiva ua tofia ma valaauina ai lo outou soifua mo le feau ma le galuega a le Atua. E iai le talitonuga, ua maua le malosi e faaauau ai lo tatou faiva, mo nai fanau, ina ia tutupu ma soifua a'e i le Talalelei ia Iesu Keriso.

O lea lava o lo'o faatauaina pea le manulauti o lenei Masina, e pei ona una'i ai le faafofoga ma le faalogo a nai fanau, o le Manumalo, e maua ina ua talitonu ma faatuatua le tagata soifua i le Atua. Ua manatu foi o le tala masani lea ua aumai e tatou te talanoa ai ma nai fanau, ina ia mausali pea lo latou talitonuga, e manumalo le tagata faatuatua ma talitonu faamaoni i le Atua, o a faafitauli ma faaosoosoga e fetaiai ma le tagata, ae a tuu atu atoa lona talitonuga i le Atua, e tali mai lava le Atua e le aunoa. Ia ua na o se amataga foi e tau vavala ai la outou tapenaga, ae ua ia te outou lava le silafia ma iloa e faafoe ai la tatou faamoemoe mo Lesona a nai fanau. Ua manatu e tatou te faaauau pea le Tauloto lena mo lenei Masina, ae a outou manatu lava e sui. Ia, ona sui ane la'ia i se fuaiupu o le tatou Tusi Faitau e pei ona iai. Ia manuia tele le tapenaga mo Lesona o lenei vaiaso.

## **FESOASOANI MO LE MATAUPU:**

Fai mai le tatou Lesona o le nei taeao. “O le Vivii a Hana i le Atua”. Ae aisea la na vivii ai fua Hana i le Atua? *(tuu atu le avanoa se'i faasoa mai nai fanau, i so latou lagona i le tusi faitau o lenei taeao)* Ioe, e matautia ma ofoofogia le alofa o le Atua, e le mafai e se tasi ona vaoia le polokalame a le Atua mo ona tagata faatuatua ma talitonu ia te ia.

Ua masani tatou i Salamo fai mai o pese ma viiga i le Atua o Isaraelu pe a a'e manumalo o latou faamoemoega, mai i o latou fili sa faasagatau mai ia i latou. Peitai, e pei o se salamo o se pese o le viiga ma le faafetai ua ofoina atu i le Atua. Talu ai e le'i mafai e Hana ona fanauina se fanau, lea na ia tautō ai e toe avatu i le Atua so o se tama na te foa'iina mai mo ia, ma agalelei mai ai le Atua iā te ia. O le ala lea o le vivii leotele ma le olioli o Hana i le Atua ina ua tali mai le Atua i lana tatalo, ma lona tagi atu i le Atua mo sana tama.

Ioe, e tatau i tagata uma ona faamaualaloina i latou lava aua na te silafia ma faamasinoina amioga uma. Na te faaliliueseina le manuia o tagata, e fai ma malosi mo e vaivai, na te saunia mea e tele i e fia aai, ma tuuina atu fanau i e ua pa (1 Samuelu 2:3–5). O loo iā te Ia, le Atua e toatasi le mana o le ola ma le oti. E pule o ia i le tamaoiga ma tulaga uma e manaomia e le tagata faatuatua ma talitonu i lona mana ma lona silisiliese, e faia ai vavega uma lava.

Fanau, e ese le matautia o le tatalo a Hana ma lona faatauina atu i lona Atua, ma tuuina atu i le Atua lona loto mafatia, ma lona faalumaina, i le ulagia o ia ona o lona tulaga lē tauoloa ina ua ia lē fanauina se tama. Peitai, lea ua faaalua le alofa faivavega o le Atua, ua ia tatala noataga sa feagai ma Hana, lea ua fanau e Hana le tama o Samuelu. O le tama na ia faauuina Tavita e fai ma tupu o Isaraelu. Ua tatou vaai la iai i le matautia o le tatalo a

Hana ma lana faatoga i le Atua, lea ua manumalo Hana mai i ona fili sa taufaifai ma ula mai ia te ia. Ua faaeaina ma ua foai atu e le Atua le manumalo ia Hana ina ia iloa ma silafia e tagata uma, e pule aoao le Atua i mea uma. O a faafitauli ma mea faigata e feagai ma le tagata, a talitonu ma faatuatua i le Atua, e le tuulafoaiina e le Atua, e tali mai lava le Atua i ona taimi ma lona alofa tunoa e faavavau. Ia manuia tele outou le fanau.

**FESILI:**

- Aisea na vivii ai Hana i le Atua?  
Tuu le avanoa mo le faasoa a nai fanau.
- O le a se manaoga sa ia Hana?  
Tuu pea le avanoa e faasoa mai ai nai fanau.
- O le a se aoaoga sa e maua mai i le tala sa tatou faalogo iai?  
Tuu le avanoa e faasoa mai ai fanau.

**PESE:** *Ua ou sau ou te vivii i le Alii, ae pe faapefea oe*

.....  
**ASO SA: MATI 30, 2025**

**MATAUPU: “MATAUPU FAAMANATU”**

**FESOASOANI MO LE FAIA’OGA:**

E faatalofa atu ia outou susuga i Faiaoga i lenei vaiaso o le tapenaga mo suega o lenei Masina. E ia le talitonuga ua maua se faasiligamalosi mai feau ma galuega o lo’o outou feagai ai. Ae manatu o lea ua tatou o’o mai i le faaiuga o lenei Masina, o lea ua tuuina atu ai ia outou susuga tapenaga mo ni Fesili, e fua lava ia outou tapenaga sa feagai ai ma Lesona a nai fanau o lenei Masina. Ae ua na o toe faamanatu o nai Fesili sa talanoa atu ai i taimi o a tatou Mataupu sa feagai ai ma nai fanau. Ia manuia tele le feagai ai ma tapenaga uma.

**FESILI:**

1. O le a se auala tatou te maua ai le manumalo?  
*Ia ola i ala o Iesu ma ia tumau i le faatuatua.*
2. O le a le uiga o le tusi muamua a Ioane?  
*Apoapoi i le au-kerisiano ina ia tumau i ala o le Alii.*
3. O le a le mea e tatau ona fai e le tagata faatuatua?  
*Vivi’i i le Atua ma ‘aia ne’i galo o Ia*
4. Aiseā na fautua ai le Aposetolo ia Timoteo?  
*Ia onosai ma tumau i le galuega talai o le Talalelei ia Iesu Keriso*
5. Aisea e taua ai le tatalo ma le loto atoa i le Atua?  
E tali mai le Atua e le aunoa, aua e silasila le Atua i le loto ma le agaga o le tagata.
6. Aisea na vivii ai Hana i le Atua ?  
Ua olioli lona loto ma faafetai ina ua tali mai le Atua ia te ia.
7. O le a se manaoga sa ia Hana?  
Na ia tuu atu lona loto mafatia i le Atua ina ia fanau sa tama mo ia.
8. O le a se auala tatou te maua ai manuia o le Atua pe a tatou feagai ma puapuaga?  
Ia tatou tatalo ma tuuina atu i le Atua mea uma tatou te mafatia ai.

**PESE:** *Alive, Alive, Alive Forevermore. My Jesus is alive, alive forevermore*

**ASO SA: APERILA 06, 2025**

**MATAUPU: “O upu taumavae a Iesu i ona so’o”**

**TUSI FAITAU: Ioane 16: 1-33**

**TAULOTO: Ioane 16:28** “Ua ou sau mai le Tama, ma ou sau i le lalolagi; ou te toe tuua le lalolagi ma alu atu i le Tama.”

**Sini:** Ia malamalama tamaiti e lei tu’ua gūgū e Iesu ona so’o i le galuega, ae na ia faamavae ma faamalosi iai.

#### **FESOASOANI MO LE FAIA’OGA:**

O le agaga faafetai e le mafai ona faaitiita ia outou susuga i Faiaoga, ona o lo outou loto i le galuega ma le lava onosai i suesuega ma tapenaga o Lesona a nai Fanau. Manatu ua maua se faasiligamalosi o le tino mafaufau ma le agaga, aua tiute ma faiva tofia ua valaauina ai lo outou soifua ma lo matou ola, mo le nei foi vaega taua o le galuega talai a le Atua e ala i lana Talalelei ia Iesu Keriso ma lona alofa laveai mo tatou ma lalolagi atoa. Ia o lea foi ua amata lenei Masina Fou ua taoto foi la tatou Manulauti o lenei Masina e pei ona faatulagaina mo le faamamafa i a tatou tapenaga mo Lesona taitasi a Fanau. “Agai atu Iesu i lona Manumalo Silisiliese”.

O le ata lena o le a taula iai a tatou Lesona mo lenei Masina o Aperila. Ua manatu le Ofisa, o le a faaogaina le Tauloto i le Ioane 16: 28, e fai ma tauloto a nai fanau mo lenei Masina, ae a faapea lava e tou te silafia e iai foi nisi faiga e lelei mo nai fanau o loo outou mafuta, ia e lelei foi ona faaoga lena mo nai fanau. Ae alo ane loa mo la outou tapenaga, ua na o se amataga foi e tatala ai lau saililiga mo lenei Aso Sa. Ia manuia le tapenaga mo le Lesona.

#### **FESOASOANI MO LE MATAUPU:**

**“Ua Ou Manumalo i le Lalolagi”** O le fetalaiga tuusa’o a Iesu i lona Auso’o ma lana faalototele ina ia latou ua manumalo Keriso i fita ma faigata o le lalolagi. “Ua ou fai atu nei mea ia te outou, ina ia outou maua le filemu ia te au. E maua outou e le puapuga i le lalolagi, a ia outou loto tetele, ua ou manumalo i le lalolagi.” Ioane 16:33.

**“Ua ou fai atu nei mea iā te outou, ina ia outou maua le filemu iā te a’u.”** Lea ua iloa mai i lenei fuaiupu, lē uiga o le filemu i le leai o ni faafitauli. Ae e faasino atu le filemu o le loto ma le mafaufau. E mafai ona maua lenei filemu e ala iā Iesu, o lē na folafolaina mai o le a ia foa’i mai le agaga paia. O lenei “fesoasoani” malosi e mafai ai e soo o Iesu ona faaauau pea le galuega tusa lava pe feagai ma faigatā.

Sa ta’ua manino e Iesu o le a feagai ona soo ma faafitauli e pei o faiga lē tonu ma sauāga. E ui i lea, e iai le māfuaaga e latou te “lototetele” ai. Aisea! **“Ua ou manumalo Iesu i le lalolagi.”** E faasino atu le upu “lalolagi” i tagata e leai se faia ma le Atua. “O le lalolagi atoa o loo nofo to’ilalo i le pule a lē o loo leaga,” po o Satani. O le māfuaaga lea e lē ōgatusa ai mafaufauga ma gaoioiga a tagata o le “lalolagi” ma le **finagalo o le Atua.**

Sa faaogā e Iesu lana lava faaa’oa’oga e faailoa mai ai i ona soo, e mafai fo’i ona latou faamaoni pea i le Atua pe a tofotofoina lo latou faatuatua ia tumau. Fai mai le fetalaiga a Iesu: “Afai na ou manumalo i le lalolagi, e mafai fo’i ona outou manumalo ma outou faia faapena.”

Sa fetalai Iesu i nei upu i le pō a o le’i maliu o ia. Na silafia e Iesu ua lata ina maliu o ia, o lea na ia faaogā ai lenei avanoa e avatu ai ni fautuaga i ona so’o. O le a latou lē toe vāai iā te ia, o le a sauāina i latou ma atonu o le a fasiotia i latou mulimuli ane. Atonu sa fefefe le Auso’o o Iesu i nei faamatalaga, o lea na ia ta’ua ai upu o loo i le Ioane 16:33 e faalaeiau ai ia i latou ina ia latou loto tetele.

Ioe fanau, lea ua tatou iloa, e le’i tu’ua gūgū e Iesu ona so’o i le galuega, ae na ia faamavae ma faamalosi iai. sa ia faamalosiau ma faalototele ina ia latou tutumau ma loto tetele i le galuega talai. Ia ua a’oa’oina foi i tatou ina ia tatou lototetele o a faafitauli ma fita e o’o mai, ia outou tutumau ma le faatuatua i le Atua e ou le malosi uma lava. Ia outou manuia i le alofa o le Atua.

#### **FESILI:**

- O le a se auala sa faia e Iesu i ona so’o a’o lei Afio i le lagi?  
Sa faamalosiau Iesu ma faalototele i ona so’o, ina ia tumau ma le faatuatua.

- Aiseā na finagalo ai Iesu ia faamalosiaiu ma faalototele i ona so'o?  
Aua ua silafia e Iesu, e fetaiai pea ona so'o ma faafitauli ogaoga o le galuega.
- O le a se a'oa'oga taua ua e maua mai i le tala sa faamatalaina?  
(tuu le avanoa e faasoa mai ai nai fanau)

**PESE: *Fa'alogo ma Usita'i.***

## **Ia manuia lenei Aso Sa**

\*\*\*\*\*

**ASO SA: APERILA 13, 2025**

**MATAUPU: “E ao i tagata uma ona vivii ma faafetaia le Atua i lana Faaolataga” (Laupama)**

**TUSI FAITAU: Mataio 21: 1-11**

**TAULOTO: Mataio 21: 5** “Ia e matua fiafia o oe le tama fafine o Siona; ia alaga fiafia oe le tama fafine a Ieruselema; faauta o le a alu atu lou Tupu ia te oe”

**Sini:** Ia malamalama tamaiti o le Aso Sa o le laupama o le Aso Sa o le Tupu o le lagi ma le lalolagi..

### **FESOASOANI MO LE FAIA’OGA:**

Faatalofa ma ofoalofa atu ia outou susuga i Faiaoga o outou o le Matuaofaiva aua le a'oa'oina o alo ma fanau a le nuu ma le ekalesia ia mausali lo latou ola tuputupua'e i le Talalelei a le Atua e faavavau. Manatu ua tatou o'o mai i le vaiseuga taua o le silafia ma iloa e fanau o le ata atoa na mafua ai ona Afio mai Keriso i le lalolagi nei, ina ia tatou maua le ola ma maua atili ai lava, e ala i le taulaga o le Faaolataga. Ia atonu e le fou lenei tala i la outou faafofoga, ae maise o le malaga faatupu a lo tatou Alii Faaola o Iesu Keriso, peitai, ua taumafai e tau faamalamalama laititi atu le isi uiga taua lea o le malaga faatupu a Iesu, ina ia iloa ai e fanau le aano moni o le tala a Mataio, o lo'o tau faapupula mai. Ia ae taoto atu lava e pei ona ta'ua i se taimi muamua, ua ia te outou le faitalia, e faafoe ai le faamatalaina o le Aso Sa lenei o le Laupama, ina ia malamalama lelei nai fanau. Ia manuia le tapenaga mo Lesona o le Laupama.

### **FESOASOANI MO LE MATAUPU:**

O le aso Sa lenei ua faaigoaina faalauaitele i le kalena faakerisiano, o le aso Sa o laupama. O le aso Sa o loo faamanatuina ai le ulufale faatupu atu o Iesu i Ieruselema, ma le folaina e tagata o laupama i le auala ma alalaga ai le motu o tagata; **“Osana i le Alo o Tavita; ia manuia le ua afio mai i le suafa o le Alii. Osana i mea Aupito a luga.”**



O le malaga faatupu foi lea na amata ai le vaiaso o puapuaga o le Alii seia oo atu i lona faasatauroina i le aso Faraile, ma lona Toetu i le aso Sa a sau. O lea la o le a tatou ulufale atu i le “Vaiaso Paia.”

I le tala a Mataio lea sa tatou faitauina, o loo faamatalaina ai, ina ua taunuu le malaga faatupu a Iesu i Ierusalem, ona vevesi lea o tagata ma ua latou tuu fesili, O ai ea lenei? O ai ea lenei? Atonu e lei tupu lava muamua se mea faapea, o se tagata e tietie atu i se tamai asini i totonu o le aai o Ierusalem, ae ua alalaga tagata ma fola o latou ofu ma laupama i le ala. Atonu o le mea lea ua tuu fesili ai tagata “O ai ea lenei?” O le fesili o le lē mautonu. O le fesili o le popole i mea ane ua tupu se tetee ma faaita ai le malo o Roma i tagata Iutaia. Ioe, fai mai le tali ***“O Iesu lenei le perofeta mai Nasareta i Kalilaia”***.

O Iesu, e lē na o se perofeta, ae o le Tupu o tagata Iutaia, o le tupu foi o le lagi ma le laolagi. Fai mai le molimau a Sakaria.... ***“Ia e matua fiafia o oe le tama fafine o Siona; ia alaga fiafia oe le tama fafine a Ierusalem; faauta o le a alu atu lou Tupu ia te oe”*** Ioe, o le amataga lea o le talitonuga o tagata Isaraelu i le tupu e suli mai le aiga o Tavita na te toe faaea le nofo pologa ma le nofo toilalo o tagata Isaraelu. O le ulufale atu la o Iesu i Ierusalem o loo tietie i le tamai asini e pei ona valoia e Sakaria, o ‘inā faatoa fafagu ai i mafaufau o tagata Isaraelu le valoaga ***“Ia e matua fiafia o oe le tama fafine o Siona; ia alaga fiafia oe le tama fafine a Ierusalem; faauta o le a alu atu lou Tupu ia te oe”***

E lei fesiligia e tagata talitonu i le Atua le moni o le latou faatusaina o le ulufale atu o Iesu o loo tietie i le asini, ma le valoaga a Sakaria.

Aua e ui lava e faafitafita se ituaiga tupu o loo taula'i i ai le faamoemoe o tagata Isaraelu, ona o lo latou nofo toilalo pea i pulega a atunuu sa faatoilaloina i latou, ae e lei mate ai le faamoemoe o tagata Isaraelu i le Mesia o le a Afio mai, o ia o le Tupu. O Iesu o le Tupu o le Filemu, o le faailoga lea o lona afio mai ma le filemu, o le Tupu foi na te pulea le lalolagi uma i lona filemu. Ioe fanau, o le Afio mai o Iesu ma tietie mai i le tamai asini, o le ata o le filemu ua aumai i le lalolagi ma ona tagata. Ia manuia le Aso Sa o le Laupama.

#### **FESILI:**

- O le a se vaega taua o lo’o fa’amanatu i le nei Aso Sa?  
*Aso Sa Laupama, ma le Malaga faatupu a Iesu i Ierusalem*
- O a upu na alalaga ai tagata i le aso lenei?  
*Osana i le Alo o Tavita. Ia manuia Le afio mai i le Suafa o le Ali’i. Osana i mea aupitoaluga*
- O le a se a’oa’oga taua sa e maua mai i le tala sa faamatalaina?  
*Tuu le avanoa mo le faasoa a nai fanau*

**PESE:** Sa tietie mai Iesu i le tamai asini.

### **Ia manuia le Aso Sa o le Laupama**

---

**ASO SA: APERILA 20, 2025**

**MATAUPU: “O le toetu manumalo a’ia’i o Iesu mai le tuugamau ma le oti” (Eseta)**

**TUSI FAITAU: Ioane 20: 1-18**

**TAULOTO: Ioane 20:**

**Sini:** Ia malamalama ma taofi mau e tamaiti le manumalo a’ia’i o Iesu i le oti ma le tuugamau ua tatou maua ai le faamagaloina o tatou agasala.

#### **FESOASOANI MO LE FAIA’OGA:**

E faatalofa atu ia outou susuga i Faiaoga, malo le soifua manuia ma le tauatai i feau ma galuega ua valaauina ai lo outou soifua. E iai le talitonuga ua mafa totoga la outou tapenaga mo le Aso Sa o le Laupama ua tuanai atu, tainane foi o le Aso Maliu na sei mavae atu nei. Ae manatu o le taeao o le Eseta, le taeao segisegi o le toe soifua manumalo mai o Iesu Keriso mai le oti ma le tuugamau, lea laa tatou tapena atu iai mo le faaauauina o Lesona a

nai fanau. Ia o le a taoto atu foi i la outou faiva saili, se atoaga mo le Lesona ua faatulagaina atu mo a tatou tapenaga, ae ua na o se amataga e tatai iai la outou folasaga mo nai fanau. Ia manuia tele le tapenaga mo le Lesona o le Aso Maliu. Ia manuia tele le Eseta ia outou susuga i Faiaoga tainane nai fanau.

### **FESOASOANI MO LE MATAUPU:**

E amata lava e Ioane lana tala i le Toetu o Iesu i le ta'ua o le uluai aso na alu ai Maria i le tuugamau. Fai mai o le taimi na alu ai Maria i le tuugamau, o loo pouliuli lava, e le'i taitai ona malamalama lelei, o lona uiga o le taeao segisegi lava. E tele lava vaega o le tala a Ioane i le Toetu o Iesu o loo aumai ai le fesootaiga o le Toetu (resurrection) o Iesu, ma le toe foafoaina (recreation) e le Atua o le lalolagi e ala ia Iesu Keriso, le Upu foafoa a le Atua mai lava i le amataga. O Iesu o le malamalama ma le ola fou ua na aumaia le ola fou i le lalolagi agasala. Le ala lea ua o atu ai Maria e asi le tuugamau, ua lē 'o iai Iesu, ua toe soifua manumalo mai Iesu mai le oti lea sa faasatauroina ai o Ia, ma tuuina i le tuugamau, a'o lea ua leai se isi, ua toe soifua manumalo mai.

Tasi lea vaega taua o le molimau a Ioane, i le fesili a Iesu sa fai ia Maria le Makatala: “Funa e, se a le mea e te tagi ai? O ai o e sailia?” O le tagi a Maria, o le tagi a le tagata o loo saili ma le faanaunau, e fia maua ma fia mafuta ia Iesu. E ui lava e le o iai sona silafia ma lona iloa e uiga i le finagalo o le Atua ma lona faaali mai, ae tasi lava lona faanaunauga, e fia mafuta ma fia vaai lava ia Iesu. Ioe fanau, tasi lea faamanatu taua mo i tatou i lenei taeao o le Eseta, i le taua o le molimau a Ioane e uiga i le toetu o Iesu. Afai e te sailia ma le faanaunau ma le faatuatua Iesu Keriso, e faaali mai lava Iesu ia te oe e le aunoa.

O loo ogatotonu Maria le Makatala i le molimau a Ioane e uiga i le toetu. O le fafine na faaali muamua i ai Iesu, ma avea ma uluai misionare o le talalelei i le Toetu manumalo o Iesu mai le oti ma le tuugamau. Fai mai le molimau a Ioane e uiga ia Maria “ua ia faailoa atu foi ia te i latou ua fetalai mai e ia o ia mea ia te ia” Ua aumai e Iesu le pule, ma le faatanaga ia Maria e tala'i ai. Ua aumai foi e Iesu le feau ma le talaiga e fai e Maria.” Aisea? Ona ua na “ilola le Alii”.

Ioe fanau, o le Talalelei lena, o le tala i le Toetu manumalo mai o Iesu mai le oti ma le tuugamau, le talalelei na muai faaali ai Iesu le Alii Toetu ia Maria le Makatala. O le talalelei foi lea, ua leva ona outou faalogo muamua iai, o lo'o molimauina e le Aufaieagelia. Peitai, ua aumai e le molimau a Ioane le Talalelei e faamanatu mai ai le taua o lo tatou saili ma le faanaunau ina ia tatou maua Iesu e fai ma Alii ma Faaola i o tatou olaga i aso uma ma taimi uma e le aunoa. Ia manuia tele le Aso Sa o le Eseta, le Aso Sa o le Toetu manumalo mai o Iesu mai le oti ma le tuugamau.

### **FESILI:**

- O ai na muai faaali iai Iesu ina ua toe soifua manumalo mai?  
O Maria le Makatala.
- O le a se faanaaunauga o Maria sa ia saili ai lava ia Iesu?  
E fia maua ma fia mafuta ma lona Alii.
- O le a se a'oa'oga ua e maua mai i le tala o le toetu e tusa ma le molimau a Ioane?  
(tuu le avanoa e faasoa mai ai nai fanau)

**PESE: #40** “*A ou manatu ifo nei.*”

## **Ia manuia le Eseta**

**ASO SA: APERILA 27, 2025**

**MATAUPU FAAMANATU: LESONA O APERILA**

### **FESOASOANI MO LE FAIA'OGA:**

E ofoalofa ma faatalofa atu ia outou susuga i Faiaoga i lenei vaiaso o le tapenaga mo suega o lenei Masina. E ia le talitonuga ua maua se malosi faasili mai feau ma galuega o lo'o outou feagai ai. Peitai, e manatu o lea ua

tatou o’o mai i le faaiuga o lenei Masina, o lea ua tuuina atu ai ia outou susuga tapenaga mo ni Fesili, e fua lava ia outou tapenaga sa feagai ai ma Lesona a nai fanau mai le amataga o lenei Masina. Ae ua na o se toe faamanatu o nai Fesili sa talanoa atu ai i taimi o a tatou Mataupu sa feagai ai. Ia manuia tele le feagai ai ma tapenaga uma o lenei Aso Sa.

#### **FESILI:**

1. O le a se auala sa faia e Iesu i ona so’o a’o lei Afio i le lagi?  
Sa faamalosiau Iesu ma faalototele i ona so’o, ina ia tumau ma le faatuatua.
2. Aiseā na finagalo ai Iesu ia faamalosiau ma faalototele i ona so’o?  
Auā ua silafia e Iesu, e fetaiai pea ona so’o ma faafitauli ogaoga o le galuega.
3. O le a se vaega taua sa faamanatu ina ua toe foi Iesu i Ierusalema?  
Aso Sa Laupama, ma le malaga faatupu a Iesu i Ierusalema
4. O a upu na alalaga ai tagata i le Aso Sa o Laupama?  
Osana i le Alo o Tavita. Ia manuia Le afio mai i le Suafa o le Ali’i. Osana i mea aupitoaluga
5. O ai na muai faaali iai Iesu ina ua toe soifua manumalo mai?  
O Maria le Makatala.
6. O le a se faanaaunauga o Maria sa ia saili ai lava ia Iesu?  
E fia maua ma fia mafuta ma lona Alii o Iesu.
7. O le a se a’oa’oga sa e maua mai i le tala o le malaga faatupu a Iesu agai atu i Ierusalema?  
(tuu le avanoa e faasoa mai ai nai fanau ma maka a latou tali)
8. O le a se a’oa’oga sa e maua mai i le tala o le toetu e tusa ma le molimau a Ioane?  
(tuu le avanoa e maka ane ai le faasoa a nai fanau)

**PESE:** *Fa’alogo ma Usita’i.*

### **Ia manuia le Suega**

**ASO SA: ME 04, 2025**

**MATAUPU: “O Iesu o le Vine moni”**

**TUSI FAITAU: Ioane 15: 1-17**

**TAULOTO: Ioane 15: 1&17** “O a’u nei o le vine moni, a o lo’u Tama o le galue vine ia. O la’u poloaiga lenei ia te outou, ia outou fealofani.”

**Sini:** *Ia malamalama tamaiti i le uiga o faataoto ma le faatatau e aoaoina ai i latou i le malo o le Atua.*

#### **FESOASOANI MO LE FAIAOGA:**

Malo le sopo, malo le soifua manuia, malo le le faalogologotiga i feau ma galuega ua valaauina ai lo outou soifua. O lea ua tatou o’o mai i le Masina lona lima (5) lenei, e le ititi ai le agaga faafetai i le Atua, ona o lona faaaogaina pea o lo outou soifua e fai ma avefeau o lana Talalelei mo fanau lalovaoa a le nuu ma le ekalesia. Peitai, ua manatu e tau sui foi sina ata mo lenei Masina, aemaise o lo tatou taumafai e tuu nai fanau i totonu o a tatou tapenaga mo Lesona. E manaia foi ae tofi se tamaitiiti e sauni mo le Tatalo Amata i le Aso Sa, ona tu’u loa lea i ai le avanoa. Ia iloa e tamaiti e tāua le Tatalo Amata. E ta’u atu ai o le a amata le Lesona. O feiloa’iga, aoina o sene ma tauvala’auga, o nai gaoioiga “fa’avevela” na. Ae a fai loa le tatalo, ua tataua ona fa’alogo ma ua’i uma mai le faalogo i le Lesona o le a fai. O le vala’aulia lea o le Agaga Paia e afio mai e pulea le taimi atoa. Tatalo mo le Faia’oga ma le Lesona. Talosia tamaiti e le’i o’o mai, nisi o mama’i, ma ē ua o’o mai ina ia aogā le Lesona mo tagata uma, ma ia iloa e fanau, o lālā i latou o le Vine a le Atua. Ia manuia le tapenaga mo le Lesona.

**FESOASOANI MO LE MATAUPU:**

Sa fa'alaeiau atu Iesu i ona so'o e ala i se talanoaga māfana faaleuō. Ua amata lana faamatalaga e faapea: "**O a'u o le vine moni, a o lo'u Tamā o le galue vine o ia.**" O ia o le vine lea sa atia'e e lona Tamā, talu mai le taimi na faauuina ai o ia i le Agaga Paia. Peita'i ua faailoa atu e Iesu, e lē na o ia e fa'aāta mai e le vine e ala i le faapea atu. O lālā uma ua iā te A'u e lē fua mai, e aveeseina e lo'u Tamā, a o lālā uma e fua mai, e na te teuteuina ina ia saga fua tele mai. E pei ona lē mafai ona fua mai o se lālā pe a lē tumau ona pipii i le vine, e faapena fo'i outou, pe a lē tumau ona autasi o outou ma a'u. O a'u o le vine, a o outou o lālā.

Ua faailoa manino atu e Iesu i ona soo, pe a ia tuua i latou o le a ia auina mai se fesoasoani, o le Agaga Paia lea. I le lima sefulu (50) aso mulimuli ane, o le a maua e le 'auso'o ma isi lenā agaga, ona ave'a ai lea o i latou ma lālā o le vine. E tatau i lālā uma ona autasi ma Iesu. Fetalai Iesu: "O lē e tumau ona autasi ma a'u, o a'u fo'i e autasi ma ia, ona fua tele mai ai lea o ia, auā e lē mafai ona outou faia o se mea e tasi pe a ou lē iai." E tatau i nei lālā po o soo o Iesu ona fua tele mai e ala i le faaa'oa'o i uiga o Iesu, maelega e ta'uta'u atu i isi le Malo o le Atua.

Ae faapefea pe afai e lē tumau ona autasi se tasi ma Iesu ma lē fua mai? Ioe, lea foi ua faamatala atu e Iesu: "Afai foi e lē tumau ona autasi se tasi ma a'u, e lafoa'i ese o ia." Peita'i "afai e tumau ona outou autasi ma a'u, ma tumau fo'i a'u upu iā te outou, so o se mea lava e tou te manana'o i ai e tou te ōle atu ai, e taunuu lava."

Ua ia faamatala atu foi se tasi o auala i ona soo ia latou faia faapea: "Afai tou te tasi i a'u poloa'iga, tou te tumau ai i lo'u alofa, e pei ona ou tasi i poloa'iga a le Tamā, ma ou tumau ai i lona alofa." Ae e iai isi mea e aofia ai nai lo o le tau ina alofa i le Atua ma lona Alo. Ua fetalai atu Iesu: "O la'u poloa'iga lenei, ia outou alolofa o le tasi i le isi e pei ona ou alofa atu iā te outou. E leai lava se tasi e sili atu lona alofa nai lo o lenei, o le foa'iina atu lea e se tasi o lona ola mo ana uō. O a'u uō outou pe afai tou te faia mea ua ou poloa'i atu ai ia te outou. Ioe fanau, o le taumafai o Iesu ia faapupula i lona Auso'o le tagata e tumau ma faatuatua ia te ia, o tagata na o le Malo o le Atua e faavavau. Ia tatou tumau ma mafuta i le Atua i le tatalo, ona tatou fua tele mai ai lea i lona alofa e faavavau.

#### **FESILI:**

- Aiseā na manao ai Iesu e faailoa i ona so'o o Ia o le Vine?  
Ina ia latou iloa, o Iesu o le Vine, a o lālā i latou.
- O le a le mea e tatau ona fai e so'o o Iesu i le vine?  
Ia autasi i latou uma ma Iesu.
- O le a se a'oa'oga taua ua e maua mai i le tala e uiga i le Vine a le Atua?  
(tuu le avanoa e faasoa ai nai fanau)

**PESE:** "*O Iesu o le Vine moni, a'o lālā i tatou*"

.....

**ASO SA: ME 11, 2025**

**MATAUPU: "O le foai i mea silisili ua ia te ia" (ASO SA O TINĀ)**

**TUSI FAITAU: Mareko 14: 1-9**

**TAULOTO: Mareko 14: 9** E moni, ou te fai atu ia te outou, o nuu uma lava o lenei lalolagi e tala'iina i ai lenei tala lelei, e ta'ua ai foi lenei mea ua faia e ia, e faamanatu ai ia te ia.

**Sini:** *Ia faamalamalama i tamaiti le taua o le foai i mea sili mo le Atua, e faavae i le alofa i le Atua*

#### **FESOASOANI MO LE FAIAOGA:**

Faatulaga ma faafeiloai atu ia outou susuga i Matuaofaiva o le mataupu silisili o le galuega faafaiaoga o lo'o outou fitaituga ai mo le Atua ma lona finagalo. Malo le soifua manuia, faafetai le lava papale mo la tatou pito la'au tauave mo nai fanau ia soifua ma ola i le Talalelei ia Iesu Keriso. Manatu e taua le Aso Sa lenei mo nai Tina, le ala lea ua manatu ai e faatino ane e a outou susuga se faiga faigofie e amata ai le Lesona o lenei Aso Sa. Ae ia tulituli pea le taua o le Foai i mea sili mo le Atua e manuia ai lo latou lumanai. Ua na o se amataga foi e tatala ai la outou tapenaga, ae fai lava e outou se faiga faigofie mo a tatou Lesona. Ia manuia le tapenaga, manuia le Aso Sa o Tina.

## FESOASOANI MO LE MATAUPU:

I so’o se aiga Samoa lava, e iai lava le tagata e ana le matāfaioi o le tausī o le aiga i le itu tau tamāoaiga. E fa’amautinoa e iai le mea ‘ai a lona aiga i aso ta’itasi, ae iai fo’i le tagata e tausīa, fa’amamā. fafaga ma a’oa’o le fanau. Peitai, o le ituaiga a’oa’oga ma le tausiga lena, e na ‘o le tinā lava e mafai ona faia. O le tatou lesona i le asō, o lea ua tatou faitau ma fa’alogologo i se ituaiga tinā fa’apitoa, sa ia uuina a’ao o Iesu i le fagu alapasa. Tatou te manatua ai fo’i nai o tatou lava tinā, ma lo latou fo’i galulue pea i le ao ma le po e fai le fatuaiga ma tausī i tatou. Ae leli foi ona e fa’alogo lelei ma taumafai e pu’e pe maitau se uiga o lea tinā, e fa’amanatu atu ai ia te oe lou lava tinā. A’o tatou fa’alogologo i ona uiga ma lana amio, tatou te iloa ai o se tinā tulaga ese lona tāua ma le sogasogā, e na te iloa lona tulaga faatinā ma lona loto talimalo lelei e foai mea silisili mo lona Alii o Iesu.

Ua le fou lenei tala i la outou faalogo ina ua uuina a’ao o Iesu e Maria i Petania i lana fagu alapasa o lo’o iai le u’u nato tautele. Na faamatala e faapea o faatinoga a Maria na faaalila ai lona alofa tele mo Iesu. O le uuina o le ulu o se malo i le uu masani o se faamamaluga lea o ia; o le uuina o ona vae o le faaalila foi lea o se faaalalo e le masani ai; ae o le uuina o le ulu ma vae i le uu nato, mai se tau tele nauā, o se faatinoga o se aga faatamalii ma le migao e seāseā ona faia e oo lava i tupu. O le faatinoga a Maria o se faaaliga o le alofa naunau; o le nanamu sasala o se loto ua ova atu i le agaga tapuai ma le naunautai ua faatumuina i le olioli ma le fiafia. Ua avea lenei tala o se faaa’oa’oga taua mo tatou i lenei Aso Sa taua e faasino i o tatou Tinā.

Ioe fanau e, e iloa gofie lava le Tinā e mata’u ma talitonu i lona Atua, e le mafai ona ia taofia se mea lelei e foai atu mo ia, o a mea uma e sili ona lelei poo lona tamaoaiga e ola ai. E le mafai lava ona ia taofia, auā ua ia silafia o Iesu o le foai silisili a lona Tamā na ia foai mai lona ola mo le lalolagi agasala. E ui o lana galuega lelei, lea ua fetalai ai Iesu o le faataimuaga o lona maliu, a o lona talitonuga ma lona loto fuatiaifo, ia foai mea silisili ua ia te ia mo lona Alii Faaola. Ioe, o le matafaioi a le Tina o Maria, e ese mai foi i le silasila ma le vaai a le Auso’o ma i latou sa iai faatasi ma Maria. Peitai, o se toe faamanatu foi mo tatou le fanau, o le foai sili mo le Atua, e sau mai le loto fuatiaifo lelei, o le tagata faimealelei mo lona matai i mea uma ua ia maua. Ia manuia tele outou le fanau, manuia le Aso Sa o Tina.

## FESILI:

- E fa’afefea ona e fa’amatalaina le tinā lea e ta’ua i le lesona?  
O le Tina lelei, o le Tina mata’u ma talitonu i lona Atua
- O le a se mea sa manatu iai lenei Tina mo lona Alii?  
Ia foai atu se mea ua ia maua, e tali atu aim o lona Alii ua Afio mai.
- O le a se a’oa’oga taua ua e maua mai i lenei tala?  
(tuu le avanoa mo faasoa a nai fanau)

**PESE:**       *“Lo’u tinā, lo’u tinā; e pele pea oe i le agaga”.*

.....

**ASO SA: ME 18, 2025**

**MATAUPU: Faataoto i le tovine**

**TUSI FAITAU: Luka 20: 9-18**

**TAULOTO: Mareko 14: 9** E moni, ou te fai atu ia te outou, o nuu uma lava o lenei lalolagi e tala’iina i ai lenei tala lelei, e ta’ua ai foi lenei mea ua faia e ia, e faamanatu ai ia te ia.

**Sini:**   *Ia malamalama ma aoaoina tamaiti i le uiga o le tala ma lona aoga i le soifua faakerisiano.*

## FESOASOANI MO LE FAIAOGA:

E le mafai lava ona alu loa le Ofisa, e aunoa ma se faatalofa ma faafeiloai atu ia outou susuga i Faiaoga. Malo le lagi e mamā ma le soifua manuia i le alofa tausī atu o le Atua i lo outou soifua ma so matou ola. Manatu ua maua se malosi faasili auā a tatou tapenaga mo Lesona a nai fanau o lenei Vaiaso Sa, ae ua na o se amataga foi

e tatala ai a outou tapenaga mo lenei Aso Sa. Ae sagai ane loa mo le Lesona. E iai lava le manatu e faaaogaina le tauloto o le Lesona ua tuanai atu, e tauloto pea e fanau, ae a outou lē finagalo iai, ia ona fai ane lea o se isi fuaiupu o le tatou Tusi Faitau o lenei Aso Sa. Afai ua uma ona tofi se tamaitiiti e faia le Tatalo Amata, tu’u muamua le avanoa i le vasega pe iai se isi e i ai se mana’oga e mana’o e tatalo ai le vasega. Afai e leai, e lelei lava ona fa’amasani i latou ia iloa e mafai ona ‘auai faatasi uma i le tatalo, e ala i ni mana’oga, pe ua’i mai ai fo’i o latou loto, a’o tatalo le isi tagata. O nai taumafaiga na ina ia o faatasi lo tatou naunau atu i a’oa’oga o le Lesona ma le tapenaga o nai fanau mo le Talalelei a Iesu Keriso. Ae manatu lava, e le faoa i se faatauvaa o le Ofisa, so outou finagalo tapena, mo nai fanau o lo’o outou mafuta i aso uma ma Aso Sa taitasi o la outou galuega faatino. Ia manuia tele tapenaga mo Lesona a nai fanau.

#### **FESOASOANI MO LE MATAUPU:**

O le faataoto a Iesu i le tovine ma le au galulue amioletonu ma le le faamaoni. O loo manino le faataoto, e oo lava i le au Iutaia sa malamalama uma ai lava i latou.

O Le Atua le fai tovine.

O le Tovine o Isaraelu.

O le au faigaluega, o taitai ia o le lotu Iutaia.

O ana auauna na omai e asi le seleselega, o perofeta ma osi taulaga.

O le atalii o le fai tovine o Iesu.

Sa tofia e le Atua taitai o le lotu latou te vaaia lona nuu. Ae fia popoto ma o ese mai le finagalo paia o le Atua.

Ona auina mai lea e le Atua o ana auauna e asi mai le galuega ma avatu fua o le seleselega, ae nonofo fasi ma tutuli ese mai le fanua. Na iu lava ina auina mai lona Alo pele e toatasi ae na latou fasioti foi ia te Ia. O le a la le mea sa fai e le Atua i le ‘au galulue tovine ma taitai nei o le lotu? Ua tuli ese ae ave le tovine i nuu ese. Ua leai so latou tofi e faatasi ai ma Iesu i le malo o le Atua.

E faamatala le tala ae atili ai le feita o le au Iutaia faafiaamiotonu nei ma latou fia fasioti ia Iesu. Lea lava latou te tau saili se mea e molia ai le Alii ma tau ai lo latou naunautaiga, ina ia fasioti i le Alii. Ioe, o le Faataoto o tala faafatusa a le Alii, ina ia iloa ai e Taitai o le lotu Iutaia, ma tagata galulue i le tovine a le Atua, ala e tataua ona feliua’ina ai o latou olaga, ina ia latou liliu mai le leaga, ae faasagatonu o latou ala mo le Atua ma lona finagalo.

Ioe fanau, o se faamanatu taua foi lea mo i tatou i lenei taeao fou, le tala i le tovine a le Atua e fai ma lu’itau o lo tatou ola tuputupua’e i totonu o lo tatou Nuū nei, o o tatou Aiga, aemaise lava o le tatou Lotu ma le Ekalesia a le Atua, ia avea i tatou ma fanau e faatupuina le fiafia ma le olioli e faamaoni i le Atua ma lona finagalo. Ia manuia tele outou le fanau i lo outou ola a’e i totonu o le galuega a le Atua.

#### **FESILI:**

- Aiseā na saga a’oa’o atu ai pea Iesu, i taitai o le lotu Iutaia?  
Ia savavali i le amiotonu a le Atua ma ia ola ai
- O le a le uiga o le Faataoto a le Alii o Iesu lea sa faamatalaina?  
O le faamanatu i taitai o le Lotu Iutaia a latou amioletonu ia liliuese mai ai.
- O le a se a’oa’oga ua e maua mai i le tala Faataoto i taovine?  
(tuu pea le avanoa e faasoa mai ai nai fanau)

**PESE: 324** “*Iesu e, o lout ovine, silasila mai iai*”

.....

**ASO SA: ME 25, 2025**

**MATAUPU: MATAUPU FA'AMANATU - LESONA O ME.**

**FESOASOANI MO LE FAIAOGA:**

E tuuina atu le lima e fai ma a'ao faatalofa o le Ofisa, malo le onosai malo le faapalepale i tiute ma faiva o lo'o feagai ai ma a outou susuga i Faiaoga. Manatu ua tatou o'o mai i le Aso Sa mulimuli o lenei Masina, o le Aso Sa e faatinoaina ai su'ega a nai fanau mo Lesona sa feagai ai ma latou i lenei Masina. Ae e iai lava le talitonuga ma le faatuatuaga o le Ofisa ia outou susuga i Faiaoga, e tapena ane ni nai Fesili e faatatau lava ia outou talanoaga ma nai fanau, ina ia faafaigofie ai la latou su'ega o lenei Aso Sa. Ua na o nai fesili e toe fesoasoani ai i a latou tspenaga sa iai ma toe faamanatu ai Lesona ua tuanai atu. Ia manuia tapenaga mo su'ega a nai Fanau.

**FESILI:**

1. Aiseā na manao ai Iesu e faailoa i ona so'o o Ia o le Vine?  
Ina ia latou iloa, o Iesu o le Vine moni, a o lālā i latou.
2. O le a le mea e tatau ona fai e so'o o Iesu i le vine?  
Ia autasi ma pipi'i i latou uma ia Iesu.
3. O le a se a'oa'oga taua ua e maua mai i le tala e uiga i le Vine a le Atua?  
O le Vine a le Atua, o Iesu, ia tatou faaa'oa'o i ala o Iesu e manuia ai.
4. E fa'afefea ona e fa'amatalaina le tinā lea e ta'ua i le lesona?  
O le Tina lelei, o le Tina mata'u ma talitonu i lona Atua
5. O le a se mea sa manatu iai lenei Tina mo lona Alii?  
Ia foai atu se mea ua ia maua, e tali atu aim o lona Alii ua Afio mai.
6. O le a se a'oa'oga taua sa e maua mai i le tala e uiga ia Maria ma le u'u nato tautele?  
Ia tatou foai mesili, ua o tatou maua mo le Atua ma lana galuega.
7. Aiseā na saga a'oa'o atu ai pea Iesu, i taitai o le lotu Iutaia?  
Ia savavali i le amiotonu a le Atua ma ia ola ai
8. O le a le uiga o le Faataoto a le Alii o Iesu lea sa faamatalaina?  
O le faamanatu i taitai o le Lotu Iutaia a latou amioletonu ia liliuese mai ai.
9. O le a se a'oa'oga ua e maua mai i le tala Faataoto i taovine?  
Ia tatou galulue ma le faamaoni, galulue ma amiotonu i ala o le Alii Faaola.
10. O le a sau fua faatatau i le olaga o lo'o e ola ai i le Talalelei a Iesu?  
Ia tatou faia mea uma i le tonu ma le sa'o ia fia silasila mai iai le Atua ia i tatou.

**PESE:** *Fa'alogoma Usita'i.*

**Ia manuia lenei Aso Sa**

**ASO SA: IUNI 01, 2025**

**MATAUPU: Liliuina le suavai e fai ma uaina**

**TUSI FAITAU: Ioane 2: 1-11**

**TAULOTO: Ioane 2: 5** Ua fai ane lona Tina i auauna, "O se mea lava e fai mai ai o Ia ia te outou, ia outou faia"

**Sini:** *Ia malamalama tamaiti o faailoga o le faaalila lea o le mana o le Atua na te mafaia mea uma, ina ia talitonu i ai tagata ma le loto atoa.*

**FESOASOANI MO LE FAIAOGA:**

E ofoalofa ma faatalofa atu ia outou susuga i Faiaoga i lenei foi vaega o lau tapenaga mo Lesona a nai fanau. Malo lava le onosai ma le faapalepale i o outou gafa tausī auā le Atua ma lona finagalo. Peitai, ua manatu le Ofisa, e tau fai sina faatinoga laititi lea pe a tusa ai ma so outou finagalo mo le faatinoga o lenei Aso Sa. A

mafa'i ona fa'atino le ata pu'upu'u lea i lalo, o le liliuina o le suavai ma uaina, e fesoasoani tele i le fa'apupulaina o lenei lesona aogā. O se sioki vai, ma se cherry kool-aid e avatu, ia vaai fanau i le suavai, ona sasa'a lea iai o le kool-aid, ina ia iloa ai le suiga o le lanu o le vai, e pei o se uaina. Ia tau faapupula ai i tamaiti e tau foliga faapena le ata sa faia e Iesu i le suavai, ae na liliuina e avea ma uaina, ua na o se faataitaiga, ae taoto atu lava ia outou susuga i nisi auala faigofie, e momoli ai le Lesona mo nai fanau. Ia manuia a outou tapenaga.

### **FESOASOANI MO LE MATAUPU:**

Fai mai le tatou Lesona i lenei taeao; Liliuina le suavai e fai ma uaina. A'o le fesili, aisea na liliuina ai e Iesu le suavai e fai ma uaina? Ioe, o le faailoga o le faaalua lea o le mana o le Atua, na te mafaia mea uma, ina ia talitonu iai tagata i le loto ma le agaga atoa. E lē tutusa faiga o faaipoipoga a tatou i Samoa nei, ma faaipoipoga i atunuu i Sasa'e, e pei o le faaipoipoga lea sa tatou faitauina mai le tusi a Ioane. O tatou, o le teine faaipoipo e autū i ai mea uma. E faatali tagata pe faape'i le manaia o lona laei lo'o lona ofu. E laulaututu le aofia, ta se pese faapitoa, ae faamaliulu ane le auga o aute, ae tu ma faatalitali le alii faaipoipo i luma o le aofia, po'o le faapotopotoga. O faaipoipoga i Palesitina, o le tama e autū i ai. O le teine na ona alu ane lava e faataunuu, a o mea uma e gafa ma le alii faaipoipo, o ia foi e tologiina mea uma. O le iai o Iesu i le faaipoipoga, e ta'u mai ai le finagalo lilo o le Atua, na te faamanuia i mea uma ua ia faapolokalameina.

O le faaipoipoga, o le finagalo o le Atua e tataua ona faataunuu. O le ulugalii, e iai vaivaiga faaletagata, ae ua avea le iai o Iesu ua fai ma faamanuiga i lo la aso fiafia. Sa liliuina ai e Iesu le vai e fai ma uaina fou. Sa ufiufi ai e Iesu le luma o le aiga fou, ina ua fai ane lona Tina ia Iesu, ua uma le uaina, lea na ia faia ai le vavega tele lea, i vai ma'a e ono sa iai. O vai ma'a e utu ai vai mo le faamamāina i tu faa-Iutaia. Ua gaogao, ua leai se vai. O le ata o le tagata, e lē tu faamauga, e lē faifai pea sona lelei, e alu, alu lava gata. Lea ua iai nei Iesu i le faaipoipoga, ua ia faamalie le gaoga'i, ma faatumu vai ma'a i le uaina, ina ua ia liliuina le suavai e fai ma uaina fou. Ioe fanau, o le luitau lea mo i tatou, o faailoga e faaalua ai le mana faivavega o le Atua, na te lē faalumaina i tatou. O a o tatou vaivaiga ma faafitauli e feagai ma i tatou, e lē tumau ia i tatou, pe afai tatou te talitonu ma faatuatua ia Iesu na te mafaia mea uma, e ala i lona mana faivavega. Ia manuia tele outou le fanau.

### **FESILI:**

- Aiseā na liliuina ai e Iesu le suavai e fai ma uaina?  
Ua uma le uaina, ae ia faaalua ai foi le mana faivavega o le Atua
- O le a le tala a le Tina o Iesu sa fai i so'o o Iesu?  
O se mea lava e fai mai ai Iesu ia te outou, ia outou faia
- O le a se a'oa'oga ua e maua mai i lenei tala?  
(tuu le avanoa e faasoa ai nai fanau)

**PESE:** *O Ia o le Atua fai vavega*

.....

**ASO SA: IUNI 08, 2025**

**MATAUPU: "Faailoga: O le fafagaina o tagata i le vao" (Aso Sa Penetekoso)**

**TUSI FAITAU: Ioane 6: 1-14**

**TAULOTO: Ioane 6: 14** Ua iloa e tagata le faailoga na faia e Iesu, ona faapea lea o i latou, "E moni, o le perofeta moni lenei, lē malie mai i le lalolagi."

**Sini:** *Ia malamalama tamaiti i le mana poo le paoa o le Agaga Paia o le Atua ia Iesu, e faatino ai faailoga ia talitonu tagata ia Iesu o lona Alo.*

### **FESOASOANI MO LE MATAUPU:**

I le tusi sa tatou faitauina ua toe foi Iesu i Kalilaia, lea sa fafagaina faavavega ai e Iesu le silia ma le 5,000 o tagata i potoi areto e lima ma nai ia laiti e lua.

O se tu masani i lutaia i le taimi o Iesu, sa ta'u mai ai ina ua afio mai le Mesia, po o le Tupu o Isaraelu, o le a Ia fafagaina tagata i le areto mai le lagi, i le afiafi lena, na o atu ai le au soo iā te ia ma fai atu: 'Ua fai si tuai, ma o se nofoaga tuufua lenei. Ia tuuina atu tagata e o e faatau ni a latou meaai i se isi nuu o latalata mai.

E le tatau ona latou o, o le tali lea a Iesu. 'Ia outou tuuina atu i ai ni meaai.' Na faliu Iesu i a Filipino, ma fesili: O fea tatou te faatau ai ni meaai e tofu ai ia nei tagata e toatele?

O le a tele ni tupe e faatau ai ni meaai ina ia tofu ai tagata, o le tali lea a Filipino. Ona fai mai lea o Aneterea: 'O lenei tama itiiti o loo tauaveina ana mea ai, o loo iā te ia papa falaoa e lima ma i'a e lua. Ae e le taitai lava ona tou ai mo nei tagata e toatele.'

Ia fai atu i tagata e nonofo uma i le mutia, o le tala lea a Iesu. Ona ia faafetai lea i le Atua mo mea ai ma amata ona ia tofitofi i vaega. Ona sosoo ai lea ma le tuuina atu e le au soo o falaoa ma i'a i tagata. E toa 5,000 tamaloloa ma le tele o afe o fafine ma tamaiti. Na latou aai seia maoona i latou. Ona aoina ai lea e le au soo mea na totoe, e 12 ato na tutumu ai. Sa matuai ofo so'o o Iesu ma tagata sa tumuume ane iai. Ioe fanau, o le Aso Sa lenei o le Penetekoso, o le Aso Fanau o le ekalesia Kerisiano, e faamanatu ai le Afio ifo o le Agaga Paia o le Atua i luga o le Auso'o. E faapena foi le ata lenei ua faia e Iesu, ua ia faia vavega tetele i le motu o tagata, a'o faatali i latou i ni taumafataga e tufatufaina atu e Iesu ma ona so'o. Ia manuia tele outou le fanau.



#### FESILI:

- O fea na maua ai e so'o o Iesu falaoa ma i'a lea sa fai ai le vavega e Iesu?  
O le meaai sa alu atu ma le tamaititi mo ia lava.
- Na fa'afea ona tofusia le motu o tagata e toatele?  
Sa faalagolago Iesu i le mana o le Agaga Paia sa ia faatinoina ai le vavega.
- O le a se a'oa'oga sa e maua mai i le tala sa faitauina?  
(tuu le avanoa e faasoa ai nai fanau)

**PESE:** Lo'u Atua e, ua ou fia ai, ia e fafaga ia te a'u.

**ASO SA: IUNI 15, 2025**

**MATAUPU: E manuia fanau ona o le Tama (Aso Sa o Tama)**

**TUSI FAITAU: Kenese 45: 1-11**

**TAULOTO: Kenese 45: 8a.** O lenei, e le o outou na auina mai a'u iinei, a'o le Atua.

**Sini:** *Ia malamalama tamaiti e manuia fanau ona o le alofa faa-tama e pei ona faaalii i le alofa o le Atua ia Iakopo*

#### FESOASOANI MO LE FAIAOGA:

Faatulafaga ma faafeiloai atu ia outou susuga i le Matuaofaiva o le mataupu silisili mo le a'oa'oina o le Tusi Paia i alo ma fanau a le nuu ma le ekalesia. Malo le lava papale malo le faatoatoa. Manatu o lea ua tatou o'o mai i le toe masina o lenei afa tausaga, ae o ni nai fesili e faatupu manatu mo le lesona, ona o le Aso Sa o Tamā, e tatala ai la outou tapenaga, peitai, e tuuina atu pea le faatuatuga o le Ofisa iā outou susuga, auā le faamoemoe mo nai

fanau. O fesili e tata'i i ai manatu o fanau mo le lesona, aemaise le Aso Sa o Tamā. O ā gaoioiga fa'apitoa e mafai ona e faia ina ia maua ai se Aso Sa o Tamā tulaga ese ma le fiafia mo lou tamā, le tamā o lou tamā, po'o nisi lava e te fa'atamā i ai? E iai ni feau e masani ona fai e lou Tamā e mafai ona e faia, ae malolō ia? Po'o se mea e momo'o i ai lona loto e mafai ona e faia e fa'afiafia ai si ou tamā? Ia, taoto atu pea nai amataga na, ae ua outou masani ma la outou faatinoga i auala faigofie mo le Lesona. Ia manuia le Aso Sa o Tama.

### **FESOASOANI MO LE MATAUPU:**

O le tala ia Iosefa, le atalii o Iakopo o le tama e tau'a o le faamatala miti, o lana faamatalaga i lona aiga, fai mai sa fusifusi a latou saito i le fanua, faauta fo'i ua fa'atutū a latou fusi saito, ae peitai ua ia vaaia le ifoifo uma o fusi saito a ona uso i lana fusi saito, o i na tupu ai le le fiafia o le au uso i le tala lea a Iosefa, o lea sa o latou faatau atu ai ia te ia i tagata o Isamaeli mai Kiliata, lea na mafua ai ona ave i Aikupito. Fai mai sa tu'uina atu Iosefa i le fale puipui i se tasi o taimi, ona o tuuaiga sesē sa faia faasaga ia te ia.

E ui lava ina sa falepuipui o ia, ae sa o'o lava ina fa'aeaina o ia. Peitai, i lona fa'aeaina, sa avea ma pule lua o le malo o Aikupito, sa tele le oge i le nu'u, ma ua omai ai ona uso mai Kanana e faatau saito. Talofa i le matuitui ma le tiga o le alofa, ina ua iloa ane e le au uso fia aai ma ua latou malamalama mulimuli ane, o si o latou lava uso o Iosefa lea sa latou agaleaga i ai, a o lea ua fa'aeaina e Farao, e fai ma alii sili o lona malo. Vaai la tatou i le matautia o le Atua ma lana polokalama ua uma ona faataatia mo le tagata soifua, ae a ola le magafagafa le tagata ma le iloa le finagalo o le Atua, ona tutupu loa lea o faafitauli ma avea ona mafatiaga ogaoga o le olaga.

E ma'eu le alofa faamagalo o Iosea i ona uso, fai mai ona uso o Iosefa lea sa latou agaleaga ma faatauina atu i Aikupito, a o lea ua faaeaina ma tali mai i lo latou mafatiaga ua feagai ma i latou. Ioe fanau, e ese le manaia o le tali a le tagata e loto faamagalo ma iloa fuafuaga a le Atua i lona olaga, fai mai a ia. "O lenei, e le o outou na auina mai a'u iinei, a'o le Atua." Ioe, ua toe faamanau e Iosefa le alofa laveai o le Atua ia te ia, ma lona agalelei e le mafaamatalaina i nai ona uso. O le mafua'aga lea na augani ai i ona uso e o e avane si o latou Tama, ina ia latou faatasi ma ia i manuia o le Atua ua foai atu mo ia. O le mautinoa lena e Iosefa o le alofa faatamā o lona Tama o Iakopo ia te ia. O faamanuiaga foi sa faaee atu e Iakopo ia te ia, lea ua manuia ai. Ia, ua vaai la tatou iai i le taua o le iloa e Iosefa o ala o faamanuiaga, pe ana leai si ona Tama, e le o'o ia manuia ia te ia ma lona aiga. Ia manuia le Aso Sa o Tama, manuia tele outou le fanau.

### **FESILI:**

- O le a le tali a Iosefa i le agaleaga o ona uso sa faia ia te ia?  
O lona loto faamagalo e le tauimasui.
- Ae o le a se tali na iloa ai e uso o Iosefa, lona loto faamagalo?  
E le o outou na auina mai a'u iinei, a'o le Atua.
- O le a se a'oa'oga taua ua e maua mai i lenei tala?  
(tuu le avanoa mo le faasoa a nai fanau)

**PESE:** Ou te tulai ma savali, ta'u atu lou suafa,  
Logo atu i ou aiga e matautia le mana.

**ASO SA: Iuni 22, 2025**

**MATAUPU: Suega Fa'ai'u.**

### **FESOASOANI MO LE FAIAOGA:**

Malo le fa'amalolosi fa'afetai fo'i le onosa'i i lavasiga sa feagai ai o lenei vaiseuga o la tatou folauga o lenei Tausaga 2025. Ia fa'amalosia pea o outou loto e fiafia e galulue i lenei galuega o le Faiaoga Aso Sa. Ma ia outou mautinoa e le tuulafoaiina lava so outou tau mai le Atua o lē ana le galuega. Ia augofie pea lagona e faitau ma

su'esu'e i le Tusi Paia, ina ia faaosofia pea lagona ma le agaga e tautua i le Atua e ala i lenei galuega ua valaauina ai lo outou soifua ma lo tatou ola.

E iai le manatu o le Ofisa, ua na o se toe faamanatu o ni **fesili** mai Lesona ua ma'ea ona iloa e fanau, ae ua tuuina atu i a outou susuga i Faiaoga, ni fesili e tapena ai **Su'ega Faai'u** mo nai fanau ma ia latou maua pea le fiafia e auai mai i le aoga Aso Sa, ma ia fiafia i ala o le Alii.

Ia manuia le feagai ai o nai Fanau tainane, o a outou susuga ma malologa o lenei vaiseuga o le Tausaga 2025. Ia ia te outou ma nai fanau manuia o le Atua e faavavau.

**Fesili:**

1. Aiseā na o ai Iesu ma ona matua i Ierusalema?  
Na o i le tausamiga masani o le Paseka
2. O fea tonu sa maua atu ai Iesu, e ona matua?  
Sa maua atu i totonu o le malumalu o lo'o talanoa ai
3. O ai sa papatisoina Iesu  
O Ioane le Papatiso
4. O le a se faailoga sa iloa ina ua papatisoina Iesu?  
Ua avanoa le lagi, ma le ata o le Agaga Pa'ia, sa i luga o Iesu
5. E fa'afefea ona tatou 'alo 'ese mai faaososoga a le tiapolo/satani?  
Ia tatou savavali faatasi ma le Agaga Paia o le Atua
6. O le a se auala tatou te maua ai le manumalo?  
Ia ola i ala o Iesu ma ia tumau i le faatuatua.
7. O le a le uiga o le tusi muamua a Ioane?  
Apoapoi i le au-kerisiano ina ia tumau i ala o le Alii.
8. O le a le mea e tatau ona fai e le tagata faatuatua?  
Vivi'i i le Atua ma 'aia ne'i galo o Ia
9. Aiseā na fautua ai le Aposetolo ia Timoteo?  
Ia onosai ma tumau i le galuega talai o le Talalelei ia Iesu Keriso
10. Aisea e taua ai le tatalo ma le loto atoa i le Atua?  
E tali mai le Atua e le aunoa, aua e silasila le Atua i le loto ma le agaga o le tagata.
11. Aisea na vivii ai Hana i le Atua?  
Ua olioli lona loto ma faafetai ina ua tali mai le Atua ia te ia.
12. O le a se manaoga sa ia Hana?  
Na ia tuu atu lona loto mafatia i le Atua ina ia fanau sa tama mo ia.
13. O le a se auala tatou te maua ai manuia o le Atua pe a tatou feagai ma puapuaga?  
Ia tatou tatalo ma tuuina atu i le Atua mea uma tatou te mafatia ai.
14. O le a se vaega taua sa faamanatu ina ua toe foi Iesu i Ierusalema?  
Aso Sa Laupama, ma le malaga faatupu a Iesu i Ierusalema
15. O a upu na alalaga ai tagata i le Aso Sa o Laupama?  
Osana i le Alo o Tavita. Ia manuia Le afio mai i le Suafoa o le Ali'i. Osana i mea aupitoaluga
16. O ai na muai faaali iai Iesu ina ua toe soifua manumalo mai?  
O Maria le Makatala.
17. O le a se faanaaunauga o Maria sa ia saili ai lava ia Iesu?  
E fia maua ma fia mafuta ma lona Alii o Iesu.

18. Aiseā na manao ai Iesu e faailoa i ona so'o o Ia o le Vine?  
Ina ia latou iloa, o Iesu o le Vine moni, a o lālā i latou.
19. O le a le mea e tatau ona fai e so'o o Iesu i le vine?  
Ia autasi ma pipi'i i latou uma ia Iesu.
20. Tusi mai se a'oa'oga taua ua e maua mai i tala sa faamatalaina i lenei Kuata.

**PESE:** *Fa'alogo ma Usita'i.*

**Ia Manuia Malologa o lenei Afa Tausaga.**



**Tautua Printing Press**  
**Congregational Christian Church of American Samoa**  
1 Kanana Fou Street, Box 1537  
Pago Pago, American Samoa 96799  
[www.efkasonline.org](http://www.efkasonline.org)

